

摘藻堂四庫全書薈要

經部

欽定四庫全書叢要

經部

欽定春秋傳說彙纂卷十七

詳校官原任侍講臣王紘緒

欽定四庫全書薈要卷一千八百八

經部

欽定春秋傳說彙纂卷十七

文公

楊氏士勛曰魯世家文公名興僖公之子以襄王二十六年即位諡法慈惠愛民曰文

集說 元年 晉襄二年齊昭七年衛成九年蔡莊二

年杞桓十一年宋成十一年秦穆三十四年楚成四十六年

春王正月公即位

穀梁

繼正即位正也

胡傳

即位者告廟臨羣臣也國君嗣世定於初喪必逾年然後改元書即位者緣始終之義一年不

二君緣民臣之心不可曠年無君

集說

杜氏預曰先君未葬而公即位不可曠年無君范氏甯曰繼正謂繼正卒也隱去即位以見

讓桓書

即位示安忍莊閔僖不言即位皆繼弒氏穎達曰釋例曰遭喪繼立者每新年正月必改元

正位百官

以序故國史書即位於策以表之文公成

公先君之喪未葬而書即位因三正之始明繼嗣之

正表朝儀以固百姓之心此乃國君明分制之大禮

譬周康王麻冕黼裳以行事事畢然後反喪服也雖

踰年行即位之禮名通於國內必須既葬卒哭乃免

喪古之制也啖氏助曰嗣子爲君明年正月朔就

位南面改元高氏閔曰文成定即位於未葬之前

皆稱公者既踰年也一年不可二君故終年稱子又

不可曠年無君故踰年雖未葬稱公也 朱子曰天子諸侯之禮與士庶人不同故孟子有吾未之學之語謂此類耳如伊訓元祀十有二月朔亦是新喪伊尹以奉嗣王祇見厥祖固不可用凶服矣漢唐新主即位皆行冊禮君臣亦皆吉服追述先帝之命以告先君蓋易世傳授國之大事當嚴其禮而王侯以國爲家雖先君之喪猶以爲己私服也 黃氏翰曰人君即位之別有四始死正嗣子之位既殯之後嗣君即繼體之位君踰年合正改元之位三年合正踐阼之位如春秋書元年即位則是踰年正改元之位也月正元日舜格於文祖伊尹以冕服奉嗣王歸於亳則是三年正踐阼之位也然崩薨之日或在歲終則蓋有未殯而踰年者矣 家氏鉉翁曰即位必以歲首改元亦必以歲首若歲首不書即位而餘月書之則非元年正始之義 李氏廉曰魯自隱至文六君惟文公承國於先君得書即位 汪氏克寬曰文定

及九峰蔡氏皆以即位之事冢宰攝告廟攝臨羣臣
朱子則以他事可攝即位不可攝而又謂嗣君以先
君之喪爲己私服其意蓋欲權一時之宜如借
吉之例以繼世正統而三年之服不可廢也

案胡傳據高宗諒陰之說援引虞商二書以爲冢宰
攝告廟臨羣臣而人主不親其事今以朱子之言考
之則他事可攝即位不可攝乃不易之定論也曾子
問總服不祭則踰年告廟或使他人攝之若即位改
元而臨羣臣萬無可攝
之理故今不從胡傳

二月癸亥日有食之

公日上
有朔字

集說杜氏預曰癸亥月一日不書朔官失
趙氏鵬飛曰不書朔失其朔也

天王使叔服來會葬

左傳

元年春王使內史叔服來會葬公孫敖聞其能相人也見其二子焉叔服曰穀也食子難也收

子穀也豐下必

有後於魯國

公羊

其言來會葬何會葬禮也

穀梁

葬曰會其志重天子之禮也

胡傳

凡崩薨卒葬人道始終之大變也不以得禮爲常事而不書其或失禮而害於王法之甚者聖

人則有削而不存以示義者矣

集說

周禮職喪掌諸侯之喪杜氏預曰叔氏服字諸侯喪天子使大夫會葬禮也孔氏穎達曰

蘇氏云外卿來會葬不書此書者尊王使故特書之傳稱內史叔服內史於周禮爲中大夫天子大夫例

書字知叔氏服字也高氏閱曰葬者臣子之事會葬者諸侯相送終之辭也天王惟有弔贈含禭之禮今使叔服來會葬是自同於諸侯也黃氏仲炎曰桓王崩七年而後葬見諸侯不恤天子之喪也僖公以夏四月葬而王使叔服先二月至魯見天子急於奉諸侯之喪也冠履倒置至此極矣家氏鉉翁曰天子所以厚諸侯是以無貶桓公之薨王使榮叔錫命王不稱天爲追命篡賊而貶也成風之葬召伯來會王亦不稱天以其用夫人之禮於妾母而譏之也僖公魯之賢君書天王使叔服來會葬無貶也俞氏臯曰天王使會葬惟一見經其餘則知其不會也汪氏克寬曰諸侯五月而葬僖公薨至是三月而王臣來會葬者豈王室謹禮以懷諸侯惟恐失期而先至也歟僖公未嘗遣使會惠王之葬而襄王遣使會僖公之葬比事以觀得失見矣

附錄左傳於是閏三月非禮也先王之正時也履端
於始舉正於中歸餘於終履端於始序則
不愆舉正於中民則不
惑歸餘於終事則不悖

夏四月丁巳葬我君僖公

左傳

夏四月丁巳葬僖公

穀梁

薨稱公舉上也葬我君接上下也僖公葬而後舉謚謚所以成德也於卒事乎加之矣

天王使毛伯來錫公命

左傳

王使毛伯衛來錫公命

公羊

錫者何賜也命者何加我服也

穀梁

禮有受命無來錫命錫命非正也

胡傳

諸侯終喪入見則有錫歲時來朝則有錫能敵王所懷則有錫黻冕圭璧因其終喪入見而錫

之者也禮所謂喪畢以士服見天子已見賜之黻冕圭璧然後歸是已車馬衰黼因其歲時來朝而錫之者也詩所謂君子來朝何錫予之雖無予之路車乘馬又何予之玄衮及黼是已彤弓旅矢因其敵愾獻功而錫之者也詩所謂彤弓昭兮受言藏之我有嘉賓中心貺之鐘鼓既設一朝享之是已今文公繼世喪制未畢非初見繼朝而獻功也何爲來錫命乎故穀梁子曰禮有受命無來錫命來錫命非正也

集說

杜氏預曰毛國伯爵諸侯爲王卿士者諸侯即位天子賜以命圭合瑞爲信僖十一年王賜晉

侯命亦其比也

孔氏穎達曰僖二十四年傳有原

伯毛伯杜云原毛皆采邑此毛與彼計是一人而注

不同者此毛當是文王之子封爲畿外之國於時諸侯無復有毛或是世事王朝本是絕滅從此以後常稱毛伯國名尚存仍爲伯爵必受得采邑爲畿內諸侯故注彼云采邑此云國也封爵既存故云諸侯爲王卿士者周禮大宗伯以玉作六瑞以等邦國王執鎮圭公執桓圭侯執信圭伯執躬圭子執穀璧男執蒲璧冬官玉人桓圭以下皆謂之命圭是用之以命諸侯也諸侯即位天子賜之以命圭魯是侯爵當賜之以信圭也玉人又云天子執冒四寸以朝諸侯其冒邪刻其下與圭頭相合諸侯執圭以朝天子天子執冒以冒之觀其相當以否所以合瑞爲信也僖十一年晉惠公新立王賜之命此亦新立是其比也劉氏敞曰錫命者何命爲諸侯也諸侯在喪稱子踰年即位終喪受命正也未畢喪命之非正也既畢喪不受命亦非正也程氏端學曰文公在衰經中安然受之而不辭毛伯不諫而從君之令皆非也李

氏廉曰杜氏以爲諸侯初即位天子錫以命圭如侯
執信圭之類公羊以爲賜以命服以晉惠初立王賜
之命而晉侯受玉情證之則杜氏得之晉武公以請
命於王而詩人有子之衣安且吉之辭證之則公羊
亦得之故胡氏取禮經黻冕圭璧之說然後其義始
備汪氏克寬曰諸侯之嫡子必誓於王以爲世子
及其君薨必告於王王遣使省其終事遂命世子嗣
爲諸侯三年喪畢乃以士服入京師見天子於廟而
受命焉未受命不敢服其服已見天子錫之黻冕之
服與命圭合瑞於是服之以歸設奠於祖廟然後臨
其臣民焉春秋諸侯立世子既不誓於王及其嗣位
又不請命於京師王不能罪因而命之兩失之矣公
羊以錫命爲加服劉氏辨其非或者謂命爲諸侯非
賜命服并文定之說爲疑夫黻冕圭璧乃所以命爲
諸侯也蓋天王之錫命有以始立而錫命者有以有
功而錫命者有既沒而追命之者此年毛伯錫命及

魏公命曲沃武公爲晉侯召武公賜晉惠公命皆始
立而賜命者也召伯廖賜齊桓公命尹氏王子虎內
史叔與父策命晉文公皆以其有功而錫命者也崇
叔錫桓公命及成簡公追命衛襄公皆既死而追命
之者也若召伯之賜成公命則始立未賜命歷八年
而後命之耳劉定公之賜齊靈公命雖非有功王將
娶於齊故以私恩命之也春秋之書錫命莫非譏且
苟謂諸侯不往拜命爲貶而天王之錫命無責則曷
爲不待其來
見而命之哉

晉侯伐衛

左傳 晉文公之季年諸侯朝晉衛成公不朝使孔達
侵鄭伐縣訾及匡晉襄公既祥使告於諸侯而
伐衛及南陽先且居曰效尤禍也請君朝王臣從師
晉侯朝王於溫先且居胥臣伐衛五月辛酉朔晉師

圍戚六月戊戌
取之獲孫昭子

匡杜注在潁川新汲縣東北今河南開封府扶溝縣西有匡城戚杜注衛邑在頓丘衛縣西今直

隸大名府開州北
七里有古戚城

集說

王氏沿曰衛成怨晉文執歸京師故季年不朝而且侵其鄰國示不從盟主也襄公嗣位欲修

伯業先以衛侯之罪告於諸侯復聽且居之言朝於王所乃命大夫伐衛取其戚田諸侯於是畏威復歸於晉昔年齊桓公卒五公子爭立霸業遂廢今襄公克纘父功繼爲盟主首能威服諸侯故春秋書曰晉侯伐衛貴之也陳氏傅良曰春秋苟其君意雖卿帥不書故伐衛書晉侯不書先且居成十三年伐秦書晉侯不書樂書襄十年滅偃陽書晉侯不書荀偃士臼哀元年伐晉書衛侯不書孔圉所謂深探其本

也趙氏鵬飛曰襄公即位之初遽能伐叛討貳以
求諸侯聖人許而爵之衛不能屈尚有報怨之師聖
人於衛伐晉則書人貶衛也貶衛所以予晉也鄭
氏玉曰晉侯爲伐衛而行故書晉侯伐衛不爲朝王
故不書朝王汪氏克寬曰文宣以後大夫專政凡
征伐會盟君雖在而大夫任其事故經書晉侯而傳
言大
夫也

叔孫得臣如京師

左傳

叔孫得臣
如周拜

集說

杜氏預曰謝賜命得臣叔牙之孫杜氏諤曰
受王之寵命苟躬朝於京師猶曰緩也況不朝

而使卿拜命乎故直書以示譏趙氏鵬飛曰拜錫
命也錫固非所宜錫而拜錫者庸爲是乎錫之在喪

拜之在喪既拜則釋衰服韍矣釋衰服韍文公之心其安乎安則爲之家氏鉉翁曰拜錫命也在喪不能躬往使臣可也除喪朝王然後於禮爲盡而文公循習舊事不能往也汪氏克寬曰文公之立天子既使大夫會僖公之葬又使襄內諸侯來錫命不親往拜而僅使得臣焉襄王猶不之罪且使榮叔歸成風舍貽繼使召伯會成風葬而文公在位十有八年歷襄頃匡王三世終其身不朝於京師觀春秋所書此事以考之其罪不可掩矣

衛人伐晉

左傳

衛人使告於陳陳共公曰更伐之我辭之衛孔達帥師伐晉

集說

劉氏敞曰左氏曰君子以爲古古者越國而謀非也古者雖越國而謀所謀者必義事也今陳

與衛何謀哉謀畔命侵小者也謀畔命侵小是非古
矣何以謂之古 呂氏本中曰嘗聞以小事大者未
聞以小而謀大者也以小而謀大滅亡之道也 張
氏洽曰霸主聲罪致討不自反其不仁無禮之罪乃
稱兵報伐故書人罪孔達也 趙氏鵬飛曰春秋之
時所宗者霸主爾聖人豈苟抑諸侯而私霸主哉存
霸主所以使諸侯有所宗也今衛成抗霸主而伐之
是亦犯上矣故聖人於晉伐衛書侯而衛伐晉書人
均諸侯也貶衛而予晉者存霸主也 李氏廉曰春
秋與國伐伯者三衛人伐晉齊侯伐衛遂伐晉齊侯
衛侯伐晉皆有關於衛 汪氏克寬曰春秋
不書晉之取戚而人孔達予晉而罪衛也

秋公孫敖會晉侯于戚

此大夫專會諸侯之始

左傳

秋晉侯疆戚田故公孫敖會之

集說

孔氏穎達曰僖二十九年翟泉之盟諸侯之卿

為會魯侯故貶稱人則魯卿會他諸侯亦合貶

而春秋魯大夫皆不貶者貶他國之卿以成體例體

例已舉於魯不須加貶

趙氏鵬飛曰

三家之子孫雖自僖公

不復改易也

而僖之世莫見其橫蓋僖所不容也及文公之初則

已專盟會矣孟公自教而專叔孫氏自得臣彭生而

橫季孫氏自行父而侈教慶父之子得臣彭生皆子

牙之孫而行父季友之孫也

吳氏澂曰凡魯卿會

外君直書不隱以見其非

程氏端學曰諸侯非王

命自為會罪也況魯國有喪以大夫而會霸主乎晉

襄居喪而下會大夫亦非禮也李氏廉曰內大夫

特會外諸侯五教會晉侯于戚行父會齊侯陽穀歸

父會齊侯于穀歸父會楚子于宋叔弓會楚子于陳

也此為大夫特會諸侯之始而胡

氏特發傳於歸父之下不知所謂

也此為大夫特會諸侯之始而胡

冬十月丁未楚世子商臣弑其君頹

頹俱倫反
公穀作髡

左傳

初楚子將以商臣爲大子訪諸令尹子上子上曰君之齒未也而又多愛黜乃亂也楚國之舉

恒在少者且是人也蠱目而豺聲忍人也不可立也弗聽既又欲立王子職而黜大子商臣商臣聞之而未察告其師潘崇曰若之何而察之潘崇曰享江芊而勿敬也從之江芊怒曰呼役夫宜君王之欲殺女而立職也告潘崇曰信矣潘崇曰能事諸乎曰不能行乎曰不能能行大事乎曰能冬十月以宮甲圍成王王請食熊蹯而死弗聽丁未王縊諡之曰靈不瞑曰成乃瞑穆王立以其爲大子之室與潘崇使爲

太師且掌環列之尹

集說

何氏休曰楚無大夫言世子者甚惡世子弑父之禍也不言其父言其君者君之於世子有父

之親有君之尊言世子者所以明有父之親言君者所以明有君之尊又責臣子當討賊也 啖氏助曰

楚僭號已久世子必不誓於天子今以商臣之逆故特書世子以明其罪 劉氏敞曰穀梁曰日髡之卒

所以謹商臣之弒也非也即不日者乃不謹商臣之弒乎 王氏葆曰願亦弒其兄熊羆而得位者終不

免商臣之禍天道好還豈不昭然 陳氏傳良曰楚國未志其志願何世子弒君不可以楚不志也 家

氏鉉翁曰子上之言忠矣楚成能用之豈有是乎有國家者不可不知所戒耶 王氏錫爵曰傳謂謚靈弗

瞑改成乃瞑君薨舉謚常在葬時安得謚於未殯之日此左氏之鑿也

案唐郭瑜對世子弘謂春秋義存褒貶以善惡為勸戒故商臣千載而惡名不滅此正合於聖人之旨所謂春秋成而亂臣賊子懼也弘天性仁愛故卒不忍讀耳非瑜誤陳經義以春秋為可廢也胡傳深貶其

說謂身後惡名不足以繫亂賊之邪志而懲於爲惡
又曲引董子之論寬篡弒嚴首惡累數楚成之罪而
以高臣爲不待貶是亂春秋之名分失輕重之權衡也故不錄

公孫敖如齊

左傳穆伯如齊始聘焉禮也凡君即位卿出竝聘踐
修舊好要結外援好事鄰國以衛社稷忠信卑

讓之道也忠德之正也信
德之固也卑讓德之基也

集說

何氏休曰書者譏喪娶吉凶不相干高氏閻
曰會晉歸而復聘齊魯人於是兩事齊晉且圖

婚於齊故也

汪氏克寬曰左氏於凡諸侯朝聘悉
以爲禮既不察其不能謹天下之通喪又不考其尊

周交鄰之疏數僖公三十年宰周公來聘而公子遂
報聘於京師且初聘於晉此年毛伯錫命則得臣往

拜而教亦初聘於齊比
事以觀不貶而惡自見

案諸侯在喪惟不親與於會盟耳若使臣以往未爲
不可邦交有常期往來有定禮三年之久安能杜封
疆絕賓禮耶權衡駁左氏太過惟汪氏以尊周
交鄰之疏數爲言似亦有理故與左氏竝存

附錄左傳

殺之役晉人既歸秦帥秦大夫及左右皆
言於秦伯曰是敗也孟明之罪也必殺之

秦伯曰是孤之罪也周芮良夫之詩曰大風有隧貪
人敗類聽言則對誦言如醉匪用其良覆俾我悖是
貪故也孤之謂矣孤實貪以
禍夫子夫子何罪復使爲政

丙襄王二
申十七年

二年

晉襄三年齊昭八年衛成十年蔡莊二
十一年鄭穆三年曹共二十八年陳共

七年杞桓十二年宋成十二年秦
穆三十五年楚穆王高臣元年

春王二月甲子晉侯及秦師戰于彭衙秦師敗績

彭衙杜注

馮翊郃陽縣西北有彭衙城在今陝西西
安府白水縣東北六十里漢於此置衙縣

左傳

二年春秦孟明視帥師伐晉以報穀之役二月
晉侯禦之先且居將中軍趙衰佐之王官無地

御戎狐鞠居爲右甲子及秦師戰于穀也晉梁弘御戎萊駒爲
晉人謂秦拜賜之師戰于穀也晉梁弘御戎萊駒爲

右戰之明日晉襄公縛秦囚使萊駒以戈斬之囚呼
萊駒失戈狼躡取戈以斬囚禽之以從公乘遂以爲

右箕之役先軫黜之而立續簡伯狼躡怒其友曰盍
死之躡曰吾未獲死所其友曰吾與女爲難躡曰周

志有之勇則害上不登於明堂死而不義非勇也共
用之謂勇吾以勇求右無勇而黜亦其所也謂上不

我知黜而宜乃知我矣子姑待之及彭衙既陳以其
屬馳秦師死焉晉師從之大敗秦師君子謂狼躡於

是乎君子詩曰君子如怒亂庶遄沮又曰王赫斯怒爰整其旅怒不作亂而以從師可謂君子矣秦伯猶用孟明孟明增修國政重施於民趙成子言於諸大夫曰秦師又至將必辟之懼而增德不可當也詩曰毋念爾祖聿修厥德孟明念之矣念德不怠其可敵乎

集說

何氏休曰稱秦師者愍其衆惡其將前以不用賢者之言匹馬隻輪無反者今復重師敗績師

敵君不正者賤之不嫌得敵君劉氏敬曰戰而言及者主之者也猶曰晉侯爲志乎爲此戰也程子

曰越國襲人秦罪也忘親背惠晉惡也秦經人之國以襲人雖忿無以爲辭矣故其來不稱伐晉不輸秦

而與戰故書晉及忿以取敗故書敗績黃氏仲炎

曰秦穆公反自殽陵悔過自誓未幾尋怨再致彭衙

之衄是雖悔其非而未嘗改也悔而不改何取於悔哉晉襄得志於殽可以已矣當秦兵再至則修文告

以郤之若展禽所以犒齊師者秦必愧而反矣不此
之圖而逞志於再戰是則晉襄之罪也蓋秦穆憤於
敗而不能平晉襄扭於勝而不能屈血氣用事而無
理義以養其心終於稔怨結讎黷武殘民而已春秋
書秦晉之戰所以爲世之不能懲忿窒慾者之戒嚴
矣哉趙氏鵬飛曰前日殺之役兵端實起於秦秦
不入滑則晉不敗秦也殺之敗穆公歸而悔過自咎
可謂賢矣然悔其敗而治戎練卒以圖再舉則是禍
方深矣何悔之有其後三十年秦晉之戰無虛歲兵
連禍結荼毒生民皆起於秦穆之悔不悔於德而悔
於力其所以悔者非其道也程氏端學曰秦穆邀
利以取敗不自悔責而事報復又取敗績其罪著矣
晉襄公忘喪而主乎此戰雖勝無足道矣汪氏克
寬曰王氏云彭衙秦地而晉師在焉亦知晉之欲戰
矣

案胡傳謂敵加於己已有罪焉則引咎責躬已無罪而不義見加則諭之以辭命猶不得免焉亦告之天子方伯若遽然興師與戰是謂以桀攻桀斯言也可謂濶於事情矣當時周室衰微雖告於天子豈能止侵伐之暴胡氏固嘗有言天子能治諸侯則春秋不復作矣若謂告於方伯則晉固霸主也自襄王彤弓之賜文固始霸襄實繼霸鄰國有相侵伐者晉猶當起而問之況敵加於己乎敵加於己必待告於天子方伯而後應焉則敵已造其國都而宗社墟矣胡氏之說今無取焉

丁丑作僖公主

左傳 丁丑作僖公
主書不時也

公羊 作僖公主者何為僖公作主也主者曷用虞主用桑練主用栗用栗者藏主也作僖公主何以

書譏何譏
爾不時也

穀梁

作爲也爲僖公主也立主喪主於虞吉主於練

壞廟壞廟之道易
檐可也改塗可也

胡傳

作主者造木主也既葬而反虞虞主用桑期年

而練祭練主用粟用粟者藏主也何以書僖公
薨至是十有五月然後作主慢而不敬甚矣夫慢而
不敬積惡之原也以爲無傷而不去至於惡積而不

可拵所以
謹之也

集說

何氏休曰禮平明而葬日中而反虞以陽求陰
謂之虞者親喪已下壙皇皇無所親求而虞事

之虞猶安神也用桑者取其名所以副孝子之心期
年練祭埋虞主於兩階之間易用粟也夏后氏以松

殷人以柏周人以栗禮士虞記桑主不文吉主皆刻而謚之藏於廟室中常所當奉事也禮作練主當以十三月劉氏敞曰譏不時也其不時奈何古者蓋葬而虞期而練喪事即遠天下之達禮也過之者猶不及也又曰公羊曰刺欲久喪而後不能非公自情緩不作主爾何以知其欲久喪杜氏諤曰十二公作主祔廟未嘗書之今書作僖公主必有所譏也高氏閔曰周人卒哭而祔祔而易主是謂虞主既期而練練而易主是謂練主僖公薨十有五月非虞練之時而方作主猶未祔廟也猶未祔廟者欲躋之故也張氏洽曰事亡如事存故作主以象神而祭之禮既葬作主於墓不終日而虞祭不忍一日忘親也僖公元年四月葬今乃作主慢而違禮甚矣家氏鉉翁曰逆祀有萌議論未定緩於作主以是故也几筵馬特祀在寢三年喪畢遭烝嘗乃於廟鄭氏又

汪氏克寬曰左氏云卒哭而祔服氏云造木主立

云惟祔與練祭在廟祭訖主反於寢其大祥與禫祭其主自然在寢祭之穀梁謂吉主於練於練焉壞廟則待練而始祔今考檀弓云殷既練而祔周卒哭而祔孔子善殷竊謂祔廟則當吉祭苟卒哭而遷廟遽用吉祭不近人情故文定取穀梁言練祭易粟主而後祔廟也

三月乙巳及晉處父盟

因朝而盟始此

左傳 晉人以公不朝來討公如晉夏四月己巳晉人使陽處父盟公以恥之書曰及晉處父盟以厭

之也適晉不書諱之也

公羊

此晉陽處父也何以不氏諱與大夫盟也

穀梁

不言公處父仇也為公諱也何以不言公之如晉所恥也出不書反不致也

胡傳

及處父盟者公也其不地於晉也諱不書公者抑大夫之伉不使與公為敵正君臣之分也適

晉不書反國不致為公諱恥存臣子之禮也凡此類筆削魯史之舊文眾矣

集說

杜氏預曰處父為晉正卿不能匡君以禮而親與公盟故貶其族去則非卿故以微人常稱

為耦以直厭不直不地者盟晉都孔氏穎達曰春秋卿則書名氏賤者則稱人外卿之貶例皆稱人魯

卿之貶乃去其族去族與稱人相類即是不為卿也處父為晉正卿不能匡君以禮君使盟魯即從君命

親與公盟故貶去其族然則不貶處父稱人者貶之稱人則惡名不見貶其族留其名所以惡處父也釋

例曰隨此稱人則所罪之名不章故特書處父也翟泉澶淵亦會公侯所以稱人者以其眾卿非一例

總貶陸氏淳曰淳聞於師曰凡大夫與公盟若非彼疆逼我而盟例但書人言非大夫之罪也今晉逼

公令與大夫盟故特書其名以見其罪 劉氏啟曰
穀梁曰何以知其與公盟以其日也非也公盟不日

者多矣何以能必之 杜氏諤曰高侯之盟主在於
公而此主在處父也 高氏閻曰凡盟必書地惟他

國大夫來魯盟及魯大夫往他國盟不地蓋各於國
中故也 陳氏傅良曰朝而遂盟之於是始凡諱國

惡恥在公則但書其事不書公者恒辭也諱在其事
則但書公不書其事公會晉侯于黑壤為公不與盟

故不書盟公如晉為止公送葬故不書葬甚諱之也
張氏洽曰盟於晉之都而君不出恥甚矣故諱之

趙氏孟何曰齊晉伯業盛時未嘗使諸侯受盟於
其國魯閔公襄公童子侯也桓公出盟閔于落姑悼

公出盟襄于長檣不敢以非禮加於列國也魯君如
伯國受盟自文公始而晉襄怒其不朝使其大夫盟

公以恥之晉卑諸侯甚矣 家氏鉉翁曰魯喪未除
晉責之以朝魯當以禮拒之而冒喪而朝所以愈受

欺於疆國春秋去處父族非特爲魯諱亦責晉也
李氏廉曰處父之仇與高倭之仇一也處父去氏而
高倭存族者彼於防而此於晉也何氏云親就其國
恥不得其君故使若得其君也又曰處父繫國而去
氏荀庚良夫等繫氏而去國者此兼罪晉侯之失彼
止罪大夫之專也汪氏克寬曰抑大夫之仇與及
高倭荀庚孫良夫卻犇孫林父向
戍同晉時以處父辱公故又去氏

夏六月公孫敖會宋公陳侯鄭伯晉士穀盟于垂隴

木反穀作穀垂隴公穀作垂斂垂隴杜注鄭地滎
陽縣東有隴城京相璠曰滎陽東二十里今在河南

開封府滎
澤縣東北

左傳公未至六月穆伯會諸侯及晉司空士穀盟于
垂隴晉討衛故也陳侯爲衛成於晉執孔達

以說

穀梁

內大夫可以
會外諸侯

集說

杜氏諤曰春秋盟會未有外大夫別會於諸侯者垂隴之會譏政在於大夫也桓文之霸或盟

王人或致天子是天子受制於諸侯也春秋不與之故書王人以先諸侯晉襄紹伯致諸侯而大夫會之

是諸侯受制於大夫也春秋亦不與之故序諸侯以先士穀許氏翰曰明年衛人會晉伐沈則知衛服

於垂隴之會矣陳氏傳良曰大夫而敵諸侯於是始晉遂以大夫主諸侯也然士穀主盟曷爲序諸侯

之下春秋不以大夫主盟也故訖於宋不以大夫主盟翟泉貶此何以不貶貶不於甚則於其事端餘實

錄而已矣故書士穀自書士穀而後凡役書大夫桓文之伯會盟有大夫則但稱人會檜稱邾人會溫稱

秦人必世子也則得次小國之君自垂隴主士穀新城主趙盾而後大夫與諸侯序戚之盟書齊國佐沙隨之會書宋華元甚者無伯而安甫之會君與大夫並列矣薛氏季宣曰垂隴之會士穀始專晉國之事也桓文沒大夫擅專諸侯之會盟自公孫敖士穀始也其臣固有罪也使之者亦非也黃氏仲炎曰晉士穀會盟諸侯晉政在大夫也家氏鉉翁曰天子命上公董諸侯之成此東遷以後之變禮非盛時所行晉襄使其臣盟公侯自是爲例春秋書其僭吳氏澂曰晉以士穀主盟魯以公孫敖仇三國之君皆非禮也故書以譏之衛敢於伐盟主者孔達之罪也今陳侯爲請而執孔達衛服其罪故免於晉之伐也程氏端學曰士穀以襄公之命盟諸侯則是大夫主盟也禮樂征伐自大夫出矣又曰案伯者之大夫盟自僖二十九年翟泉之盟始至此則士穀主諸侯矣李氏廉曰內大夫出盟諸侯自柔始繼而公

子結及齊宋又繼而公孫敖會三國矣 王氏錫爵
曰既命之卿例皆書名奚堪與不堪之論哉 陳氏
際泰曰翟泉以列國之大夫盟王臣大夫張也見諸
侯之輕天子也垂隴以伯主之大夫盟諸侯大夫張
也見伯主之
輕諸侯也

自十有二月不雨至於秋七月

穀梁 歷時而言不雨文不憂雨
也 不憂雨者無志乎民也

胡傳 書不雨至於秋七月而不曰至於秋七月不雨
者蓋後言不雨則是冀雨之辭非文公之意也

夫書不雨至于秋七月而止即八月嘗雨矣然而不
書八月雨者見文公之無意於雨不以民事繫憂樂
也其怠於政事可知
而魯衰自此始矣

集說

趙氏鵬飛曰不雨者數月而文公不一念及其志荒矣僖公一月不雨必書見其有愛民之心

也六月雨亦書知其有喜雨之志也今自十二月不雨至于秋七月文公蓋以爲旱無與乎已也不雨至于秋七月則八月雨矣雨亦不書以見文無復喜雨爲無益於我也以此觀之僖文父子之賢否抑亦判矣 家氏鉉翁曰穀梁謂文不憂雨深得春秋垂訓之旨 汪氏克寬曰禮稱至于八月不雨則君不舉今文公自十二月不雨至七月則陰陽之氣不和而恒暘爲災者八越月矣文公漫不之省雖禫制未終而屢行朝聘會盟祭祀之事其無恤民之心若是豈可以居民上乎公羊謂不書旱不雨之日長而無災范注亦云未爲災誤矣蓋旱爲災而不久則書旱早爲災而久則書某月不雨至某月綱目於漢獻之世書四月不雨至七月而分注人相食則爲災可知矣

八月丁卯大事于大廟躋僖公

左傳

秋八月丁卯大事于大廟躋僖公逆祀也於是夏父弗忌爲宗伯尊僖公且明見曰吾見新鬼

大故鬼小先大後小順也躋聖賢明也明順禮也君子以爲失禮禮無不順祀國之大事也而逆之可謂禮乎子雖齊聖不先食久矣故禹不先鯀湯不先契文武不先不密宋祖帝乙鄭祖厲王猶上祖也是以魯頌曰春秋匪解享祀不忒皇皇后帝皇祖后稷君子曰禮謂其後稷親而先帝也詩曰問我諸姑遂及伯姊君子曰禮謂其姊親而先姑也仲尼曰臧文仲其不仁者三不知者三下展禽廢六闕妾織蒲三不仁也作虛器縱逆祀祀爰居三不知也

公羊

大事者何大禘也大禘者何合祭也其合祭奈何毀廟之主陳於大祖未毀廟之主皆升合食

於大祖五年而再殷祭躋者何升也
何言乎升僖公譏何譏爾逆祀也

穀梁

陳於大祖未毀廟之主皆升合祭於大祖躋升

也先親而後祖也逆祀也君子不以親害尊尊此春秋之義也

胡傳

有事者時祭大事禘也合羣廟之主食於大廟升僖於閔之上也閔僖二公親則兄弟分則君

臣以爲逆祀者兄弟之不先君臣禮也

集說

何氏休曰以言大與有事異又從僖八年禘數之知爲大禘大祖周公之廟陳者陳列大祖前

大祖東鄉昭南鄉穆北鄉其餘孫從王父父曰昭子曰穆昭取其鄉明穆取其北面自外來曰升殷盛也謂三年禘禘所以異於禘者功臣皆祭也禘猶合也文公緣僖公於閔公爲庶兄置僖公於閔公

上失先後之義故譏之 范氏甯曰僖公雖長已爲
臣矣閔公雖小已爲君矣臣不可以先君猶子不可
以先父故以昭穆父祖爲喻 趙氏匡曰凡祭而失
禮則書祭名祭非失禮爲下事 張本則稱事 劉氏
敞曰大事于大廟春秋記嘗記烝記禘記郊未有曰
大事者此其曰大事何也曰是乃諸侯之大事也諸
侯之事無大於此者矣 裕之謂也 奚以言之王者禘
禘其祖之所自出以其祖配之 諸侯禘祫毀廟之主陳
乎大祖大夫士享或四廟或三廟或二廟庶人薦於
寢故曰德厚者流光德薄者流卑時祭稱有事 裕祭
稱大事大之外無加者矣 孫氏覺曰閔僖之爲君
臣較然於人一旦以臣而上君亂法之甚 孫氏抃
曰世與昭穆云者據父子之正而言也 若兄弟則昭
穆同不得以世數之矣 趙氏鵬飛曰兄弟一家之
私恩世統天下之大義 僖之繼閔世統之正也 安可
以私恩而亂世統哉 聖人謹而志之以著其失垂萬

世之法也此柳下惠所以稱夏父弗忌爲不祥而仲尼又以罪臧文仲爲不知禮歟家氏鉉翁曰三傳明逆祀皆已得之但謂閔僖昭穆各自爲世不可不辨左傳曰子雖齊聖不先父食此言君臣猶父子非謂閔爲文祖也公羊乃云先禰後祖穀梁云無昭穆則無祖也杜預曰閔僖不得爲父子嘗爲臣位應下今居閔上逆也孔穎達發明杜意頗詳若兄弟各爲世祭昭穆之序斷不可行矣吳氏澂曰四時之祭稱祭名而曰烝曰嘗者五廟各祭也曰有事於大廟者四廟之主遷於大廟而合祭也是爲禘曰大事於大廟者毀廟之主亦與祭自伯禽以下禰廟以上之主皆合祭于大廟也是爲大禘程氏端學曰文公居喪未大祥而吉祭於大廟非禮一也僖公之主未嘗入宮非禮二也躋僖公於閔公之上非禮三也李氏廉曰古者戎祀皆國之大事季氏將有事於顯吏以兵事爲有事也天子有事於文武以祭祀爲有

事也故春秋書大禘爲大事書禴祠烝嘗爲有事此
年大事禘也宣八年有事禴也昭十五年有事烝也
此皆於祭無譏故不書祭名其郊禘大雩皆書祭名
者祭之僭也烝嘗有書祭名者祭之失也此年大事
之爲禘公穀皆同杜氏以爲禘者非也又案僖閔逆
祀杜氏只以爲位次之逆不以爲昭穆之異胡氏辨
世指父子之義恐未至汪氏克寬曰穀梁謂逆祀
是無昭穆范甯曰以昭穆父祖爲喻何休謂惠公與
莊公當同南面西上隱桓與閔僖亦當同北面西上
孔穎達正義曰閔僖不得爲父子同爲穆爾今升僖
先閔此二公位次之逆非昭穆亂也若兄弟相代即
異昭穆設令兄弟四人皆立則祖父之廟即已從毀
禮必不然今考文定此傳用韋昭說父爲昭子爲穆
僖爲閔臣臣子一例而以閔僖各爲一世襄公三年
謂哀公以襄公爲皇考亦以昭公各爲一世則是異
昭穆矣然於仲嬰齊後歸父則引何休以爲亂昭穆

之序竊疑古者一君各爲一廟則兄弟同昭穆共爲
 一世祫祭大廟則魯當以僖公特設位於閔公之下
 後世同堂異室不可以二先君共祭於一室必至於
 異昭穆而仍以兄弟共爲一世數之也然曾子問云
 七廟五廟無虛主諸侯祫祭則祝逆四廟之主是諸
 侯之昭穆無過四廟天子之昭穆無過六廟考之春
 秋哀公之世桓宮猶在則是祭十君而八世定公立
 煬宮則是祭二十一傳之祖後世天子之廟有十餘
 世歷十四五君而其廟皆不毀說禮者反引
 春秋以爲證而聖王經世之制不可復見矣
 案兄弟昭穆廟制與五年再殷祭之說諸家之說紛
 然不一皆不可以不辨祭統曰昭穆者所以別父子
 遠近長幼親疎之序而無亂也周禮小宗伯辨廟祧
 之昭穆鄭注曰自始祖之後父爲昭子爲穆賈疏曰
 周以后稷廟爲始祖不窋父爲昭鞠子爲穆從此以
 後皆父爲昭子爲穆是故父子異昭穆兄弟昭穆同

弟必不可爲兄後子必不可爲父孫也小宗伯所爲
辨之者恐其父子兄弟之序之有亂而辨之也如三
傳及胡傳皆以閔僖爲父子則是以兄爲弟後以子
爲父孫其亂昭穆之序也甚矣鄭氏謂商六廟自契
至湯二昭二穆考之殷本紀陽甲盤庚小辛小乙兄
弟四王如果兄弟異昭穆各爲一代則武丁之祭將
不能上及祖乎晉賀循謂禮兄弟不相爲後不得以
承代爲世又謂兄弟相代則共是一代昭穆位同不
得兼毀二廟禮之常例也殷之盤庚不繼陽甲而上
繼先君以弟不繼兄故也華恒謂兄弟及禮之變
也宜爲神主立室不當以室限神主又謂廟當以容
主爲限無拘常數又謂以七爲正不限之七室雖有
兄弟及不越昭穆溫嶠謂兄弟同代於恩既順於
義無否唐禮官謂兄弟不相爲後不得爲昭穆晉武
帝時景文同廟廟雖六代其實七主至元帝明帝廟
皆十室宋禮官亦謂兄弟繼統同爲一代魯隱桓繼

及皆當穆位殷陽甲至小乙兄弟四人相承故不稱
嗣子而稱及王明不繼兄之統也唐中睿皆處昭位
敬文武昭穆同爲一世伏請每大祭太祖太宗昭穆
同位祝文竝稱孝子又謂兄弟一體無父子之道父
爲昭子爲穆不刊之典也據此歷代禮官之議合之
何氏孔氏之言可以知四傳之爲謬矣汪氏克寬斟
酌情理可謂盡善故特錄之至所謂五年再殷祭者
漢儒每援此爲禘祫相因之說何氏鄭氏謂三年祫
五年禘徐邈謂相去各三十月三十月而祫三十月
而禘唐自睿宗而後五年一禘三年一祫各自計年
不相通數開元二十七年乃至禘祫竝在一歲宋熙
寧八年亦至既禘又祫竟無一定之論善哉乎楊氏
復之說曰夫殷祭乃大祫之祭也五年而再殷祭謂
三年一祫五年再祫也於禘祭乎何與可以一掃諸
家之紛紛
多端矣

冬晉人宋人陳人鄭人伐秦

左傳

冬晉先且居宋公子成陳轅選鄭公子歸生伐秦取汪及彭衙而還以報彭衙之役

胡傳

案左氏四國伐秦報彭衙之役則皆國卿也其貶而稱人者晉人再勝秦師在常情亦可以已

矣而復興此役結怨勤民是全不務德專欲力爭而報復之無已也以致濟河焚舟之師故特貶而稱人

集說

劉氏敞曰晉人宋人陳人鄭人伐秦左氏曰卿不書爲穆公故尊秦也非也於經何以知其非

微者稱人乎

程子曰秦以憤取敗晉可以已矣而復伐秦報復無已殘民結怨故貶稱人高氏閌曰

三國以伐秦再舉兵而過京師尤其惡之大者陳

氏傅良曰曷爲不序大夫將猶稱人也自士穀專盟

書大夫自陽處父專將書大夫是故春秋之始大夫將恒稱人由救鄭之後大夫始貶稱人矣李氏廉

曰此條左氏尊秦之義非經意其說如襄八年邢丘
貶諸侯以尊晉相類胡氏說本程子其貶晉同是但
自入春秋以來至此除魯大夫帥師外外兵非君將
者皆稱人如隱五年邾鄭伐宋桓十四年宋以四國
伐鄭齊桓之霸伐宋伐鄭伐英氏晉襄以三國
伐許與明年五國之伐沈皆未有書大夫名氏者則
陳氏之考據
不爲無見

公子遂如齊納幣

左傳

襄仲如齊納幣

公羊

納幣不書此何以書譏何譏爾譏喪娶也娶在
三年之外則何譏乎喪娶三年之內不圖婚吉

禘于莊公譏然則曷爲不於祭焉譏三年之恩疾矣
非虛加之也以人心爲皆有之以人心爲皆有之則

者爲獨於娶馬譏娶者大吉也非常吉也其爲吉者主於已以爲有人心焉者則宜於此焉變矣

胡傳

昏姻常事不書其書納幣者喪未終而圖昏也夫娶在三年之外矣則何譏乎春秋論事莫重

乎志志敬而節具與之知禮志和而音雅與之知樂志哀而居約與之知喪非虛加之也重志之謂也此皆使人私欲不行

閑邪復禮之意

集說

董氏仲舒曰春秋譏文公以喪娶難者曰喪不過三年三年之喪二十五月文公四十一月乃

娶何以爲喪娶曰事莫重乎志納幣之月在喪內故曰喪娶也且文公以秋禘祭以冬納幣皆失於太早三年之喪肌膚之情也反在思念娶事春秋之所甚疾也何氏休曰僖以十二月薨至此未滿二十五月又禮先納采問名納吉乃納幣四者皆在三年之內范氏甯曰喪制未畢而納幣書非禮

劉氏敞

曰左氏曰禮也則是喪娶為禮不亦悖乎杜預遷
 僖公薨月以就傳說然文公此年大事于大廟則已
 自除喪矣彼尚能逆祀何故不能於此娶乎明此傳
 誤無為歸過於經而疑之也孫氏覺曰納幣之禮
 婚姻之將成也文公於納幣之時而猶在喪制之月
 春秋以其喪而謀婚故書以罪之也左氏之說范甯
 非之當矣高氏閱曰婚禮有六曰納采曰問名曰
 請吉曰納徵曰請期曰親迎自有次第納幣者即納
 徵也公始祥而納幣則納采問名皆在三年之內矣
 夫三年之內不圖婚聖人於此譏之所以闡幽也
 汪氏克寬曰據春秋十二公皆不書納幣惟此年及
 莊公親往則書之又曰喪雖二十五月大祥然中月
 而禫必二十七月始為終制況春秋凡書四時皆指
 首月此書冬則納幣在十月是僖公之薨甫及二十
 三月殺哀而圖婚失禮甚矣宣公元年逆女其蔑禮
 視此尤甚然其篡立之罪已極於喪娶乎何誅陳

氏際泰曰莊公不勝其母逾期納幣焉君子以爲已
緩矣文公不喪其父不及期納幣焉君子以爲已亟
矣

案左傳謂襄仲如齊納幣禮也凡君即位好舅甥修
昏姻娶元妃以奉筮盛孝也孝禮之始也此不待辨
而知謬者也人君即位自非始封皆有三年之服喪
而圖婚何禮之有杜注孔疏以長歷衍之謂喪服已
終又以納幣之前尚有納采問名納吉不能併行於
一月之內因謂公爲太子時已行昏禮皆曲附左氏

而遷就
其說也

丁襄王二年
晉襄四年齊昭九年衛成十一年蔡莊
酉十八年三年
二十二年鄭穆四年曹共二十九年陳

共八年杞桓十三年宋成十三
年秦穆三十六年楚穆二年

春王正月叔孫得臣會晉人宋人陳人衛人鄭人伐沈

沈潰

霸國大夫會諸大夫伐國自此始也汝南平輿縣北有沈亭今河南汝寧府汝陽縣

東南六十里有平輿故城沈亭在其地

左傳

三年春莊叔會諸侯之師伐沈以其服於楚也沈潰凡民逃其上曰潰在上曰逃

集說

孫氏覺曰沈者楚所與之國也諸侯不忍楚之暴於是伐其所與之國將以懼之沈小國不勝

而潰沈何罪乎春秋書之以諸侯爲失所伐矣劉氏絢曰一被侵伐而民散君之不能可知矣蔡潰沈

潰許潰是也王氏葆曰霸國大夫會諸大夫伐國自伐沈始會諸大夫救患自救鄭始春秋皆貶人之

不與大夫之專政也蓋舉兵伐人使之畏服所謂威也率衆救人使免於難所謂福也威福人主之利器

諸侯擅之則有害於天下大夫擅之則有害於國聖人見微知著故於此二役皆貶之所以戒威福之不可下移也高氏閔曰魯使卿往則諸國必非微者獨得臣書名氏者詳內且明諸國皆卿行書人以貶之也文公三年之間遂教得臣累見於經則知魯政盡在諸臣矣漢五行志文公時大夫始專政信夫胡氏銓曰春秋侵伐之柄下移於諸侯自是遂移於大夫矣趙氏鵬飛曰內書得臣則外亦大夫矣外書人則亦人內矣晉襄紹霸未嘗一出與諸侯為衣裳之會而區區以大夫主之吾於此知晉襄之不足與有為矣襄公之霸易於桓文桓制楚於方張文敗楚於既熾難乎為力而襄公之世高臣有滔天之惡楚人棄之此襄公之霸資也而襄不能就乃竭力於無事之秦而以大夫主會卒之大夫橫於內諸侯受其弊區區潰蕞爾之沈以為能伐楚之與國也嗚呼隘矣宜聖人人之以示貶也家氏鉉翁曰楚高臣

負滔天之罪於今二年使晉襄仗義而前天諸侯孰不鼓勇而從者晉之霸業有光於前矣乃舍其大而務其細以諸侯之兵伐沈而潰之避豺虎而獵狐兔雖潰百沈何益乎故春秋貶人之案伐沈之役五國皆稱人先儒之說以為威福下移而政在大夫者高氏閔胡氏銓也以爲諸侯失所伐而晉襄舍大務細不足有爲者孫氏覺家氏鉉翁趙氏鵬飛也蓋皆以書人爲貶也胡傳謂雖非義舉而與報復私怨者有間故其辭無褒貶恐非經旨今故不錄

附錄左傳

衛侯如陳拜晉成也

夏五月王子虎卒

左傳

夏四月乙亥王叔文公卒來赴弔如同盟

胡傳

也王子虎不書爵譏之天子內臣無外交

集說

杜氏預曰不書爵者天王赴也翟泉之盟雖輒假王命周王因以同盟之例為赴孔氏穎達

曰王子虎即王叔文公也謚之為文必當有爵不書爵者畿內之國不得外交諸侯其臣不敢赴魯必天

子為之赴赴以王子為親不復言其爵也啖氏助曰穀梁云叔服也叔服若是王子則會葬之時何不

書王子乎趙氏匡曰臣無外交之禮今死而赴故書以譏又曰左氏云弔如同盟禮也案天子大夫無

與諸侯盟之禮而曰禮也豈春秋之意乎孫氏復曰外大夫來赴非禮也劉氏敞曰王子虎者何天

子之大夫也外大夫不卒此何以卒或曰為其嘗臨諸侯之盟也高氏閌曰赴於諸侯而書其卒蓋著

其交政於諸侯也陳氏傅良曰公穀以為叔服非是李氏廉曰左氏注王子虎太宰文公王卿士也

內史叔服王之大夫也後十四年星孛之變又載叔服之言則分明兩人矣啖子陳氏亦以公穀爲非不知胡氏何据且胡氏於星孛之下又引叔服之言則亦不以左氏爲非矣不知何不照應如此汪氏克寬曰或者謂虎與卷皆夾輔天子於艱難危困之中故春秋賢而卒之然單穆公旗與劉文公翼贊敬王以安周室亦不書卒竊疑王子虎盟諸侯於王庭劉文公爲王官伯尹氏世執朝權皆王室之秉政者故特赴於諸侯而魯史記其卒春秋存而弗削以示王臣不當赴喪於列國耳

秦人伐晉

左傳秦伯伐晉濟河焚舟取王官及郊晉人不出遂自茅津濟封穀尸而還遂霸西戎用孟明也君子是以知秦穆公之爲君也舉人之周也與人之壹也孟明之臣也其不解也能懼思也子桑之忠也其

知人也能舉善也詩曰于以采芣于沼于汜于以用之公侯之事秦穆有焉夙夜匪解以事一人孟明有

馬詒厥孫謀以燕

翼子子桑有焉

王官杜注晉地今山西平陽府臨晉縣東南七十里王官谷有廢壘即王官城也郊杜注晉地史

記取王官及鄆正義曰鄆音郊當爲臨晉平陽間小邑茅津杜注在河東大陽縣西今山西平陽

府平陸縣南有大陽渡即春秋茅津也有古茅城南對陝州

胡傳

案左氏秦伯伐晉濟河焚舟封殺尸而還其稱人何也聖人作易以懲忿窒慾爲損卦之象其

辭曰損德之修也春秋諸侯之知德者鮮矣穆公初聽杞子之請違蹇叔之言其名爲貪兵是慾而不能窒也及敗於殽歸作秦誓庶幾能改將窒其慾矣復起彭衙之師報殽函之役其名爲忿兵是忿而不能

懲也今又濟河取郊人之稱斯師也何義哉晉人畏秦而不出穆公逞其忿而後悔自是見伐不報始能踐自誓之言矣是故於此貶而稱人備責之也

集說

程子曰構怨連禍殘民以逞晉人畏之而不敢出秦人極其忿而後悔過聖人取其終能悔耳

陳氏傅良曰此秦伯也曷為貶稱人穀之誓孔子有取焉而秦穆之連兵無虛歲故自韓原秦不以爵

見於經張氏洽曰穆公既歸自穀而作秦誓矣然彭衙及此役猶以報復為事豈非悔過之心不能勝

其恥敗之心而至此乎趙氏鵬飛曰秦穆公伐晉以報前日三敗之辱也而說者以穆公之霸在此齊

桓晉文之霸聖人必有褒大之辭雖宋襄之無成春秋於曹南之盟亦必書爵以揭於諸侯之上今秦於

穀之戰彭衙之役皆書師而於此乃書人豈謂其霸而反人之耶孟子之所謂五霸者其實桓文而已宋

襄之敗固所不錄而秦穆楚莊皆無予辭鄙秦楚也
今秦人伐晉實忿兵矣前日之敗兵端皆啟於秦彼
君子歟固亦懲忿窒慾爾且三敗豈晉敗之秦實伐
人實自敗爾論者徒見其殺之敗有悔咎之誓孔子
列於周書遂以爲聖人予秦穆今自殺之敗兵連禍
結以戕其民安在其爲悔也聖人特取誓之文而已
非謂進秦穆也今焚舟之勝雖霸西戎春秋書曰人
其貶可知矣鄭氏玉曰夫子於秦穆錄其悔過之
辭於書以爲法著其窮兵之禍於春秋以爲戒猶化
工之於物生殺竝行而不相悖也李氏廉曰左氏
以此役爲秦伯西戎之始且稱其舉人之周與人之
壹孟明之不解子桑之知人而胡氏諸說皆以爲貶
者左氏得其事胡氏論其義也汪氏克寬曰穆公
自誓之言追咎既往之失冀將來之善不貴勇夫而
貴良士惡媚疾而思彥聖期以保邦爲念諄諄懇惻
誠可爲有天下國家者之法則夫子取之以繼四代

之書而門人引之以釋大學平天下章亦可謂善言矣胡乃不踐其言終用孟明報復至再必以勝晉而後已故書取其言而春秋責其事也說春秋者因左傳有霸西戎之一語而史記謬稱穆公益國十二開地千里天子使召公賀以金鼓然考傳之所記則踰二年而穆公卒其謂焚舟伐晉而遂霸者已非事實況證以經之書法自戰韓稱爵其後終穆公之身竝以人書殺之役且以號舉反不若楚莊之見於經竝紀其爵則許穆公以伯者妄矣

秋楚人圍江

左傳

楚師圍江晉先僕伐楚以救江

集說

高氏閔曰江近楚自貫澤之盟已服從於齊桓而楚自城濮之後亦不敢侵伐今復圍者蓋晉

文既沒襄公不能討楚人弑逆之惡故楚復有窺諸侯之意而先圍江以試之也 吳氏澂曰自齊桓之霸江黃以近楚之國而從齊故楚憾之之深前既滅黃矣而未加兵於江者蓋江猶能守其國也故至今年有圍江之師 李氏廉曰經書人以圍國者十一圍非將卑師少所能辦皆貶辭也 黃氏正憲曰晉襄嗣位霸業始衰楚人已有侮心矣近又與秦為敵無暇圖楚高臣遂發兵圍江以威江淮間小國非專報伐沈之役也

雨螽于宋

左傳 秋雨螽于宋

公羊 何以書記異也外異不書此何以書為王者之後記異也

穀梁

外災不志此何以志也曰災甚也其甚奈何茅茨盡矣著於上見於下謂之雨

集說

杜氏預曰自上而墮有似於雨來告故書孫氏覺曰雨自上而下者也螽不見其所從來自

上而下衆多如雨而在宋之四境故曰雨螽于宋也

黃氏仲炎曰春秋書外國之災有因弔問而知之

者有聞而知之者宋大水公使弔焉是因弔問而知

之者也六鷁退飛隕石雨螽之類非弔問也特聞而

知之爾趙氏鵬飛曰螽生於下今雨於上異之大

者也此所謂天降之災外災不書此何以書赴於我

也或以爲死而隆安知其爲死吾欲聞之程氏端

學曰螽生則害五穀況如雨之多害物甚矣災異極

矣王氏樵曰螽非上隊之物來多而隊故書雨見

災甚耳既爲災則非隊而死也左氏因雨字而生說

耳徐邈云禾稼既盡又

食屋之茅茨驗嘗有之

冬公如晉十有二月己巳公及晉侯盟

此書公如晉之始

左傳

晉人懼其無禮於公也請改盟公如晉及晉侯盟晉侯饗公賦菁菁者莪莊叔以公降拜曰小

國受命於大國敢不慎儀君貺之以大禮何樂如之抑小國之樂大國之惠也晉侯降辭登成拜公賦嘉樂

集說

高氏閌曰公之如晉蓋朝也非爲盟也晉人於是請改盟夫盟已定矣又何改爲公宜固辭乃

復與盟皆非禮也

張氏洽曰不書地盟於晉都也

趙氏鵬飛曰魯能屈而事大國不憚於親朝以雪

教之抗晉能有忍不遽以干戈相向一盟而釋怨猶爲知自反者也故聖人直文無諱非若二年及處父

盟沒公以見恥處父去族以示貶者矣李氏廉曰

文公再如晉矣二年以見辱不書故此爲書公如晉

之始汪氏克寬曰前此未有因朝聘而盟於國都者諸侯有不協之故則期會於某地而牲歃以示信已非盛世之事況因其朝聘而要之哉前年朝晉晉既以處父盟公於其國此年雖云改盟而猶要公之朝以約誓於國都甚矣文公之屈辱也晉襄苟懼其無禮曷不為會於晉魯之間以相盟乎厥後荀庚孫良夫卻犇孫林父向戌且因聘魯而要盟矣又其甚則杞子以三恪之君亦即魯而歃盟焉始也魯君盟於魯國終也諸侯盟於魯世變可知矣

晉陽處父帥師伐楚以救江

公穀無以字

左傳

冬晉以江故告於周王叔桓公晉陽處父伐楚以救江門於方城遇息公子朱而還

公羊

此伐楚也其言救江何為諼也其為諼奈何伐楚為救江也

穀梁

此伐楚其言救江何也江遠楚近伐楚所以救江也

胡傳

以者不以者也救江善矣其書以何楚嘗伐鄭矣齊桓公遠結江黃合九國之師於召陵然後

伐鄭之謀罷又嘗圍宋矣晉文公許復曹衛會四國之師於城濮然後圍宋之役解今江國小而弱非能

與宋鄭比楚人圍之必不待徹四境屯戍守禦之衆與宿衛盡行也當是時楚有覆載不容之罪晉主夏

盟宜合諸侯聲罪致討乃獨遣一軍遠攻強國豈能濟乎故書伐楚以救江言救江雖善而所以救之者

非其道矣此春秋紀用兵之法也

集說

孫氏復曰先言伐楚而後言以救江者惡不能救江也楚人圍江陽處父帥師不急赴之乃先

伐楚欲其引兵自救而江圍解非救患之師也故明年秋楚人滅江陳氏傅良曰晉大夫書帥師於是

始大夫強也。張氏洽曰：楚高臣無父，無君，乃致患於江，是禽獸逼人，之甚。晉襄不能率諸侯乘此時誅之。此春秋特書以正其不能奉天討之罪也。呂氏大圭曰：春秋之初，有以大夫帥師者矣，未有若陽處父之專伐也。內大夫帥師而不氏者，則無駭帥師入極溺，會齊師伐衛是也。內大夫帥師而氏者，公子慶父帥師伐於餘丘，公孫茲帥師會侵陳是也。而外大夫則未有帥師而出主名者。若陽處父則帥師而出主名矣，以見征伐之自大夫出也。吳氏澂曰：江受楚之伐，霸者所當救也。處父畏楚兵之強，不敢徑趨江之城下，乃揚言伐楚以救江門於方城，一見息公之來，即避之而返。既不能救江，又不能伐楚，其畏怯也明矣。汪氏克寬曰：春秋書侵伐多不言所事，而此書伐以救實為特筆。考於傳之所錄，非惟楚侵陳以救鄭，伐鄭以救齊，不書雖齊桓伐厲以救徐，亦止書伐厲而不書以救也。豈非責處父既不能伐楚，又

不能救江而特起伐以救之文以罪之歟經書加兵於楚者三惟齊桓聲包茅不貢之罪而得屈完之服處父有伐楚之名而無討楚之實晉定公會十八國於召陵有伐楚之勢而僅爲侵楚之陋春秋蓋惜之也王氏樵曰襄公實無制楚憂諸夏之誠心故僅遣偏師以塞責胡傳乃議其宜合諸侯以秦甲出武闕以齊兵略陳蔡而南是時秦方爲怨耦豈所能合然使襄公有真志而務其實則亦無賴於秦也案楚滅弦滅黃齊未嘗遣一旅之師至是圍江而晉人勤之既遣先僕於前又請王師於後命上卿動大眾聲罪而致討焉非徒以孤軍塞責也且傳稱門於方城遇息公子朱而還注謂子朱爲楚伐江之師聞晉師起而江兵解故晉亦還是處父亦未嘗無功矣三年秋書圍四年秋書滅蓋江近於楚晉師既還楚師復出遂致滅耳故晉之罪在於不能存江而伐楚以救江則未見其罪也胡傳行世已久先儒多從之

今仍其說而附見此義云

戊襄王二年
四年
晉襄五年齊昭十年衛成十二年蔡莊
二十三年鄭穆五年曹共三十年陳共

九年杞桓十四年宋成十四
年秦穆三十七年楚穆三年

春公至自晉

集說

孫氏復曰自是公朝疆國皆至者惡其輕去宗廟遠朝疆國也孫氏覺曰文公之出六致之

者四危之也不致者二安之也汪氏克寬曰自是

公如皆致如晉者凡二十書至者十有三皆所以著

其去國踰時之久或執或辱故危之也始也文公如

晉則有處父要盟之恥而不書至迄其終也昭定六

如晉而不見納書至河乃復焉又不若書至之為愈

矣人君舉動之得失可不慎哉據事直書而義自見

謂此類也

附錄左傳

四年春晉人歸孔達於衛以爲衛之良也故免之夏衛侯如晉拜曹伯如晉會

正

夏逆婦姜于齊

穀梁

其曰婦姜爲其禮成乎齊也其逆者誰也親逆而稱婦或者公與其速婦之也曰公也其不

言公何也非成禮于齊也曰婦有姑之辭也其不言氏何也貶之也何爲貶之也夫人與有貶也

胡傳

逆皆稱女以未成婦而女者在父母家之所稱也往逆而稱婦入國不書至何哉此春秋誅意

之效也禫制未終思念娶事是不志哀而居約矣方逆也而已成爲婦未至也而如在國中原其意而誅

之也不稱夫人姜氏者亦與有貶焉婦人不專行何以與有貶父母與有罪也文公不知敬其伉儷違禮而行使國亂子弑齊人不能鑒微知著冒禮而往使其女不允於魯皆失於不正其始之過也夫婦之際人倫之首禮不可不謹也故交貶之以爲後鑒

集說

范氏甯曰婦禮成於齊故在齊便稱婦楊氏士勛曰公羊傳曰其謂之逆婦姜于齊何娶於

大夫者略之也徐邈亦以爲不書至不稱夫人下娶賤略之若以諸侯下娶大夫便爲略賤則大夫亦不得上娶諸侯且天子得下婚諸侯何爲諸侯不得下娶大夫是公羊之言不可以解此也蓋不稱夫人不言至者以其婦禮成於齊故異於餘稱傳曰夫人與有貶也者解不稱氏之意非釋不稱夫人也趙氏匡曰公自逆常事不書以成禮于齊所以變文云逆婦以譏之孫氏復曰此公逆婦姜于齊也不言公

者諱之也不言逆女者以其成禮于齊也以其成禮于齊故不言公以諱之劉氏敞曰逆婦姜于齊正始之道也待之不以夫人之禮故夫人不以其位終國亂子弑疆臣擅命幾於亡矣夫文公非不欲存妻子傳世者也閻弱情慢不能率禮而行以爲苟若而可何禮之守故卒至於禍也夫婦之際人倫之首可不慎哉故鑒末以原本因微以知著又非獨文公之罪也雖夫人預有罪矣當是之時夫人冒大禮以往遂無所據依以危其身而亡其子由本不正故也死而呼天不亦晚乎吾以此觀之禮之於人大矣是存則存是亡則亡文公之不能保其後嗣者由無以刑其妻也夫人之不能安其位者由無以謹於禮也此正始之道也又曰公羊曰娶乎大夫略之也此雖孤經無他證據然魯初納幣乃用上卿審娶大夫者禮豈如此崇乎程子曰納幣在喪中與喪昏同也稱婦姜已成婦也不稱夫人不可爲小君奉宗廟也

張氏洽曰聖人嚴吉凶之辨蓋人之所以異於禽獸者正以有父子之親而三年之喪哀戚之至也國君爲風教之首而納幣於喪中春秋變逆女爲逆婦姜不成其夫人之禮以見人倫之本已失何以正是國人爲後嗣之基乎家氏鉉翁曰三傳不同穀梁之義爲正公羊娶乎大夫恐未必然汪氏克寬曰春秋一經書逆夫人惟此年最略既不書逆者名氏又不書如齊不稱夫人不言氏不書至豈非聖人責文公首柩通喪之禮而然歟宣公之娶尤亟而書法加詳事同而既貶則從同也陳氏際泰曰文姜不與桓偕入抗也哀姜不可見乎宗廟仇也出姜若已成爲婦怠也女壯者或弑其夫或弑其子女弱者至不保其子與不允其身

案納幣卿行則逆婦必非微者蓋文公自行也聖人惡其成禮於齊故沒公不書以示貶穀梁得之而左

氏非也公羊以爲娶於大夫則失之遠矣逆婦雖在
免喪之後而納幣則在喪中先儒譏喪娶亦可兼用
蓋圖昏於憂服而成禮於婦
家所謂失禮之中又失禮也

狄侵齊

集說

王氏蔣曰大國如齊狄侵者四則其他邢衛魯
鄭不足怪也趙氏鵬飛曰僖三十三年狄犯

晉晉人敗之故其後狄不敢干晉之怒狄侵齊而齊
不討故至是復侵齊汪氏克寬曰狄自箕之敗至
是始復侵齊以晉襄無攘
却之謀而齊伯不紹故也

秋楚人滅江

左傳

楚人滅江秦伯爲之降服出次不舉過數大夫
諫公曰同盟滅雖不能救敢不矜乎吾自懼也

君子曰詩云惟彼二國其政不獲惟此四國爰究爰度其秦穆之謂矣

集說

高氏閔曰江終爲楚所滅則知楚之復彊而處父之帥師無益於救張氏洽曰江之不祀晉

襄之無遠謀也

趙氏鵬飛曰江之滅晉之恥而處

父之罪也晉不能服楚則何以庇江無以庇江則安

保其無滅方江受楚圍使處父帥師直赴於江江鬪

楚於前處父掎之於後楚兵未必不敗而奔也乃以

區區之師伐楚欲楚兵釋江以自救宜其不能撼楚

而致江之滅也江君不書奔死社稷也江之圍於是

蓋期歲矣期歲必不下則江君之賢否抑亦可見歟

滅不見執不書奔則江雖滅其君之義固存也吳

氏澂曰三年之秋楚人圍江晉人陽爲救之之名而

無救之之實江之受圍周一期而其國竟滅晉霸不

競而荆楚得以肆其虐於小國可哀也夫汪氏克

寬曰公羊云八不言圍書其重者黃書伐而江書圍

著齊晉之不能救也滅者亡國之善辭上下之同力
江黃之君不書奔不書以歸則能固守待援而死於
其位又可知矣

晉侯伐秦

左傳

秋晉侯伐秦圍祁新城以報王官之役

祁杜注秦邑當在今澄城縣境
新城杜注秦邑今陝西西安府澄城縣東北二十里有古新城地

名攷曰即梁國之新里也

集說

程子曰秦逞忿以伐晉晉畏而避之其見報乃常情也秦至此能悔過矣故不復報晉聖人取

其能遷善也稱晉侯不復加譏見秦宜得報而自悔不復修怨乃其善也朱子曰謂書晉侯而以常情

待晉襄書秦人而以王事責秦穆恐未必如此程子所謂微辭隱義未易言也張氏洽曰晉襄以王官

之役不報爲恥未若高臣之得志於江爲恥之大也報秦而不誅高臣使亂臣賊子得以夷滅小弱逞其

凶毒晉襄之爲盟主末矣比事書之深罪晉侯不以江亡爲恥而敵秦怨也趙氏鵬飛曰三年秦人伐

晉雖報三敗之辱其實非義舉也三敗秦自敗何報之有秦報之非似晉報之爲是矣雖然聖人豈欲人

之與戎交怨而不釋哉實均罪人也然曲直施報之文不辨則無以寓夫褒貶故於秦書人而晉書侯其

曲直是非之理判矣李氏廉曰秦穆晉襄五年之間交兵者五止此

案伐秦之役經書晉侯張氏洽以爲深罪襄公者是也自戰殺以來晉屢勝秦及秦伯濟河焚舟而晉避不出兩國勝負亦相當矣今又伐秦是日尋干戈以相讎也況救江則遣大夫伐秦則君親之故書晉侯

伐秦於滅江之下以見其急於修怨而緩於恤患也
趙氏鵬飛以晉報爲是蓋以秦晉交兵釁起自秦故
晉無譏爾其說亦通胡氏安國謂春秋以常情待晉
襄以王事責秦穆不責晉侯者正所以深善秦伯則
朱子亦疑其說
矣今故不錄

衛侯使甯俞來聘

左傳

衛甯武子來聘公與之宴爲賦湛露及彤弓不
辭又不荅賦使行人私焉對曰臣以爲肄業及

之也昔諸侯朝正於王王宴樂之於是乎賦湛露則
天子當陽諸侯用命也諸侯敵王所愾而獻其功王
於是乎賜之彤弓一彤矢百茲弓矢千以覺報宴今
陪臣來繼舊好君辱貺之其敢干大禮以自取戾
集說趙氏鵬飛曰禮諸侯歲相問也殷相聘也殷衆
也殷見曰同十有二年五服盡朝故曰殷見殷

見既畢諸侯更遣大夫以交聘於鄰邦是之謂殷相
聘今殷見則亡而殷聘則存所亡者在周而所存者
在諸侯則知諸侯彊而周室微矣子太叔曰文襄之
霸也其務不煩令諸侯三歲一聘五歲一朝則三歲
之聘本於文襄今襄公未沒諸侯其敢違之則甯俞
之聘霸王令也霸王之令則然矣周公之典安在哉
此聖人書之以傷周道也 吳氏澂曰案左氏所載
晉文公之季年諸侯朝晉衛成公獨不朝又使孔達
侵鄭伐絳訾及匡晉襄公既祥使告於諸侯而伐衛
圍戚取之衛不服罪而孔達敢伐伯主其明年晉會
諸侯于垂隴將伐衛幸得陳侯爲之請成執孔達以
說於晉而衛遂得免於晉伐自孔達遭執之後蓋甯
俞代之爲政至次年春衛從晉伐沈自此衛服伯主
而無事矣至次年春晉遂歸孔達其夏衛侯朝晉至
秋而來聘魯馬事大睦鄰以安社稷或者皆
出甯俞之謀也夫子稱其知可及者蓋如此

冬十有一月壬寅夫人風氏薨

左傳

冬成風薨

胡傳

風氏僖公之母莊公妾也而稱夫人自是嫡妾亂矣語曰邦君之妻邦人稱之曰君夫人稱諸

異邦曰寡小君蓋敵體之稱也若夫妾媵則非敵矣其生亦以夫人之名稱號之其卒亦以夫人之禮卒葬之非所以正其分也以妾媵爲夫人徒欲尊寵其所愛而不虞卑其身以妾母爲夫人徒欲崇貴其所生而不虞賤其父卑其身則失位賤其父則無本越禮至是不亦悖乎夫禮庶子爲君爲其母無服不敢貳尊者也春秋於成風記其卒葬各以實書不爲異辭者謹禮之所由變也

集說

陸氏淳曰啖氏曰自成風之後妾母皆僭用夫人之禮程子曰自成風以後妾母稱夫人嫡

妾亂矣仲子始僭尚未敢同嫡也蘇氏轍曰僖公之妾母也凡魯君之妾母其生也稱夫人其沒皆以夫人之禮成之而天子諸侯亦以夫人之禮禮之考之舊典則非禮也然春秋書之不爲異詞者君臣之禮也朱子曰僖公成風與晉簡文帝鄭太后一也皆所以著妾母之義陳氏傅良曰夫人某氏嫡稱也喪之以夫人之禮也隱公之喪桓母猶有疑焉是故別廟也耐姑稱謚仇然如夫人則自文公之喪成風始薛氏季宣曰妾母爲夫人僭也僭則何以取乎春秋不沒其實也黃氏仲炎曰惠公仲子而不稱夫人是當時猶不以夫人稱之也今以夫人稱成風則已甚矣或曰子爲君而不得尊其母可乎曰爲人子以所當得者加於其親而親安之則孝在是矣苟以其所不當得者加於其親使其親無以安之可謂孝乎齊氏履謙曰哀姜以罪誅死雖還其喪而葬之於誼不可以入宗廟故僖公緣此誼尊成風爲

夫人以妾亂嫡非所以正名分尊君父也至其後世
宣母敬嬴襄母定姒昭母齊歸哀母弋氏皆援例以
立失禮自成風始也春秋惟弋氏文獨異說者以爲
哀未逾年餘竝同夫人書之不沒其實而已 陳氏
際泰曰歸仲子之贈考仲子之宮已有夫人之實特
未被以夫人之名爾踵事增華變本加厲又何怪焉
禮之失也自成風昉也成風
之爲夫人也自仲子昉也

已襄王三
亥十年

五年

晉襄六年齊昭十一年衛成十三年蔡
莊二十四年鄭穆六年曹共三十一年

陳共十年杞桓十五年宋成十
五年秦穆三十八年楚穆四年

春王正月王使榮叔歸舍且贈舍且暗

舍戶
暗反

公羊

舍者何口實也其言
歸舍且贈何兼之也

穀梁

舍一事也。贈一事也。其曰且志兼也。

胡傳

珠玉曰舍車馬曰贈歸舍且贈者厚禮妾母也。不稱天王者弗克若天也。春秋繫王於天以定

其名號者所履則天位也。所治則天職也。所敕而惇之者則天之所叙也。所自而庸之者則天之所秩也。所賞所刑者則天之所命而天之所討也。夫婦人倫之本。王法所允。謹者今成風。以妾僭嫡。王不能正。又使大夫歸舍。賂馬而成之。爲夫人則王法廢。人倫亂矣。是謂弗克若天而悖其道。非小失爾。故特不稱天以謹之也。

集說

杜氏預曰。珠玉曰舍。舍口實車馬曰贈。成風莊公之妾。天子以夫人禮贈之。范氏甯曰。榮叔

天子之上大夫也。榮采地。叔字。孔氏穎達曰。公羊傳曰。兼之非禮也。賈服云。舍賂當異人。今一人兼兩

使故書且以譏之案禮雜記諸侯相弔之禮舍祔贈臨同日而畢與介代有事焉不言遣異使也言且者見有二禮而已宰咺言來歸此不言來者穀梁傳曰其不言來者不周事之用也贈以早而舍以晚其意以爲舍者所以實口當及未殯而至以其至晚故不言來以責王也案雜記舍者執璧將命坐委於殯東南有葦席既葬蒲席然則舍祔者所以助喪盡恩示其有禮而已既葬猶尚致之不必以濟其用天子之與鄰國莫不道路長遠赴者猶尚不至責其未殯而來此是禮之不道也且來者自外之文非是褻賤之意宰咺言來豈周事之用者乎趙氏匡曰公穀皆云兼之非禮也據禮舍贈祔止一人兼行爾若每事須一人則罄王朝之臣不足以克喪禮之使也劉氏敞曰王使榮叔歸舍且贈不知者乃以謂天子贈人之妾小過爾而譏之深求車殺母弟大惡也而譏之略是不及知春秋正人倫之意也君臣也父子也

夫婦也治之三綱也道莫先焉桓以臣弑君而王命之成風以妾僭嫡而王成之於三綱廢矣是失人之所以爲人也王之無天不亦明乎程子曰天子成妾母爲夫人亂倫之甚失天理矣不稱天義已明稱叔存禮也陳氏傳良曰賄常事不書惟賄仲子成風特書之則遂命爲夫人也春秋之初猶以爲非常事也宣之敬嬴襄之定如昭之齊歸雖命爲夫人不復書矣孟子卒不赴於京師孔子曰夫人之不命於天子自昭公始也汪氏克寬曰禮經天子諸侯於妾無服而周官職喪掌諸侯之喪及卿大夫士凡有爵者之喪亦不及邦國夫人之喪也今王臣舍賄則是魯以成風之喪赴於京師矣夫人之喪猶不當赴於王況妾母乎王之賜以舍賄其責已深而魯之往赴其罪亦不可揜春秋王禮之施於魯者惟桓文二公爲數且盛而紊瀆三綱有如此者亦可悲夫

案魯弒君始桓僭嫡始成風王不能正而又成之故錫命歸舍貽會葬王皆不稱天以謹其始僭嫡不謹之於仲子者仲子不稱夫人又別立宮未全乎僭故於其歸貽也名宰而已或疑王不稱天爲闕文則榮叔歸舍貽偶一闕焉可也

三月辛亥葬我小君成風

公羊

成風者何僖公之母也

胡傳

仲子雖聘非惠公之嫡也春秋之初尚以爲疑故別爲立宮而羽數特異此雖非禮之正然不

祔於姑猶有辨焉至是成風書葬乃有二夫人祔廟而亂倫易紀無復辨矣故禮之失自成風始也

集說

何氏休曰風氏也任宿顛曳之姓孫氏復曰成謚也程氏端學曰小君者嫡夫人之稱而

妾母稱之又私謚焉亂禮甚矣汪氏克寬曰後世以妾母爲正嫡至於襄事乃黜正嫡而嬖妾合葬焉如中宗之葬乾陵嚴善思諫而弗止循襲而莫知其失矣孰有如漢之孝文自謂側室之子而不以爲嫌乎者

王使召伯來會葬

召穀作毛

左傳

召昭公來會葬

穀梁

會葬之禮於鄙上

胡傳

王臣下聘桓公冢宰書名示貶而大夫再聘則無譏焉或以爲從同也或以爲同則書重也

成風薨王使榮叔歸舍且賄既不稱天矣及使召伯來會葬又與貶焉何也歸舍且賄施於妾母已稠疊

矣又使卿來會葬恩數有加焉是將祔之於廟也而致禮於成風盡矣聘一也舍贈而又葬則其事益隆亂人倫廢王法甚矣再不稱天者聖人於此尤謹其戒而不敢略也

集說

杜氏預曰召伯天子卿也召采地伯爵范氏甯曰從竟至墓主爲送葬來劉氏敞曰左氏

曰禮也非也禮庶子爲君爲其母無服不敢貳尊者也妾母稱夫人王不能正而又使公卿會葬何禮之

有杜氏諤曰薨而賄舍尚曰不可況又使卿會葬乎故復去天以示義程子曰天子以妾母同嫡亂

天理也故不稱天聖人於此尤謹其戒蘇氏轍曰

諸侯必有使來會葬者矣以微故不錄王人雖微必

書石尚歸脤是也而況召伯乎陳氏傳良曰王不

稱天於追錫桓公見之至是再見以夫人之禮喪成

風也莊僖之際天下知有盟主而已而襄王之季年

更有事於諸侯於是叔服會葬毛伯錫命尤汲汲於

魯也尤汲汲於魯而何爲乎成風一人賄舍之一人葬之以是懷諸侯吾見周之益陵夷矣宰嚭嘗以賄妾母貶則召伯何以不貶王公一體也宰書名則王不待貶而自見王不稱天則召伯不待貶而自見也桓以少篡長成風以庶亂嫡王道熄矣而莊襄不能正又從而褒賞之是以天命施之天討也故皆不稱天 家氏鉉翁曰天子之於諸侯有會葬之禮非所以施之妾母也元年書叔服此年書召伯五年之間後先兩會葬或稱天王或王不稱天比事而觀著義豈不甚明乎 汪氏克寬曰春秋君夫人葬惟僖公及成風王使大夫來會 湛氏若水曰會葬之禮諸侯所以尊天子天子答施於諸侯猶之可也而施於妾母是成其夫人而教人以妾僭嫡矣柰名分逆天理莫此之甚者也故春秋既書王使榮叔歸舍且賄又書王使召伯來會葬則王之不王其過自不可揜矣

夏公孫敖如晉

集說

高氏閔曰王舍且賄又來會葬矣捨天王而謹事晉不待貶而惡見也 吳氏澂曰三年之冬

公朝晉今又使卿往聘焉魯之謹於事霸主也魯臣如晉聘者二十四致祿會葬者又四焉始於公子遂而終於季孫斯仲孫何忌或踈或數或無所爲或有所爲考其時與事而得失見矣

秦人入郟

郟音若

左傳

初郟叛楚即秦又貳於楚夏秦人入郟

集說

高氏閔曰郟蓋微國秦以其叛而入之後遂爲楚所并楚昭王復國之後畏吳之彊去郟而都

郟矣

趙氏鵬飛曰穆公之霸西戎以威勝而已無德以懷之故不足以宗諸侯也楚商臣不君郟叛楚

而即秦以穆之霸爲足恃也及楚滅江則都懼而貳於楚秦不能以德柔之而稱兵入都彼區區小邦一舉可滅矣而穆公亦念所以致都之貳於楚者誰也秦誓曰責人斯無難惟受責俾如流吾見徒能言之矣 家氏鉉翁曰齊桓滅遂降鄆晉文請隧弗許則受田至以兵取之秦穆滅滑入都是三君者天理人欲往來於方寸之間所以僅能爲霸君子羞稱焉季氏本曰秦自入滑以窺東諸侯而不得至是入都以窺楚也非晉迫其東則其肆行豈在楚下哉

秋楚人滅六

六杜注六國廬江六縣今在江南廬州府六安州北

左傳 六人叛楚即東夷秋楚成大心仲歸帥師滅六冬楚公子燮滅蓼臧文仲聞六與蓼滅曰臯陶

庭堅不祀忽諸德之不建民之無援哀哉

蓼杜注蓼國安豐蓼縣今河南汝寧府固始縣東北蓼城岡其地即古蓼國漢蓼縣

集說

高氏閎曰楚人滅江滅六敢肆其惡逆如此者以列國不正其弑逆之罪故也 呂氏祖謙曰

邾滅須句楚滅六蓼夫須句司大皞之祀六蓼實皋陶之後此皆先王所封諸侯唐虞三代綿延不廢何故纔入春秋之世便見屠戮蓋向時間有聖賢之君相與維持故得世守其國祀至此先王德澤既斬故先王之諸侯亦不能自存此最見得天下大勢 家氏鉉翁曰武王訪帝王聖賢之後紹其封盛德事也周綱陵遲先代之後蠶食無餘若滅夔滅六滅蓼之類是也 吳氏澂曰晉襄公死期將及故其志氣不能如初年之盛紹霸之業浸以衰微故秦楚敢於肆行吞噬弱小而無所忌也

冬十月甲申許男業卒

集說 林氏堯叟曰僖公

卒昭公錫我立

附錄左傳

晉陽處父聘於衛反過甯甯嬴從之及溫而還其妻問之嬴曰以剛高書曰沈漸剛

克高明柔克夫子壹之其不沒乎夫爲剛德猶不干時況在人乎且華而不實怨之所聚也犯而聚怨不可以定身余懼不獲其利而離其難是以去之

晉趙成子欒貞子霍伯白季皆卒

甯杜注晉邑汲郡修武縣今河南衛輝府獲嘉縣西北有修武故城古甯邑秦置縣

庚襄王三子十一年

六年

晉襄七年齊昭十二年衛成十四年蔡莊二十五年鄭穆七年曹共三十二年

陳共十一年杞桓十六年宋成十六年秦穆三十九年楚穆五年

春葬許僖公

集說 俞氏皋曰不書

月史闕文也

附錄左傳

六年春晉蒐於夷舍二軍使狐射姑將中軍趙盾佐之陽處父至自溫改蒐於董易

中軍陽子成季之屬也故黨於趙氏且謂趙盾能曰使能國之利也是以上之宣子於是乎始爲國政制事典正法罪辟獄刑董逋逃由質要治舊濟本秩禮續常職出滯淹既成以授大傅陽子與大師賈佗使行諸晉國以爲常法

夷杜注晉地

董杜注河東汾陰縣有董亭汾陰

今絳州屬山西平陽府有董澤在聞喜縣東北四

十里接

絳州界

夏季孫行父如陳

左傳

臧文仲以陳衛之睦也欲求好於陳夏季文子聘於陳且娶焉

集說

杜氏預曰臣非君命不越竟故因聘而自爲娶范氏甯曰行父季友孫黃氏仲炎曰春秋

書內大夫出聘者其旨有四有書以見簡禮者有書以見諛禮者有書以見大夫專命者有書以見大夫私行者所謂簡禮者公子遂如京師叔孫得臣如京師之類是也諸侯不朝而使大夫聘也諛禮者季孫行父如晉繼於公孫敖如晉之明年之類是也使幣頻煩而不知節也大夫專命者公子遂叔孫得臣如齊之類是也非君命而行也大夫私行者公子友如陳公孫茲如牟季孫行父如陳之類是也蓋公子友以原仲之舊而茲行父以娶婦之故於是託君命以遂其私也吳氏澂曰此亦行父欲迎婦於陳而請於君借聘禮以行前此魯陳未嘗有邦交也汪氏克寬曰季友如陳者再今行父之往蓋因其祖之舊

好假公室之聘而圖婚耳春秋特書公子友葬原仲而行父之娶於陳公孫茲娶於牟嬰齊娶於莒皆止書如所以貶季友之私行而不予行父茲嬰齊因聘以濟其私欲也自逆猶可赦如莒涖盟而代弟逆媾聘宋而爲意如逆則又甚矣

附錄左傳

秦伯任好卒以子車氏之三子奄息仲行鍼虎爲殉皆秦之良也國人哀之爲之賦

黃鳥君子曰秦穆之不爲盟主也宜哉死而棄民先王違世猶詔之法而况奪之善人乎詩曰人之云亡邦國殄瘁無善人之謂若之何奪之古之王者知命之不長是以竝建聖哲樹之風聲分之采物著之話言爲之律度陳之藝極引之表儀予之法制告之訓典教之防利委之常秩道之以禮則使毋失其土宜衆隸賴之而後即命聖王同之今縱無法以遺後嗣而又收其良以死難以在上矣君子是以知秦之不

復東
征也

秋季孫行父如晉

左傳 秋季文子將聘於晉使求遭喪之禮以行其人
曰將焉用之文子曰備豫不虞古之善教也求

而無之實難
過求何害

集說 朱子曰季文子三思而後行如使晉而求遭喪
之禮以行亦其一事也 汪氏克寬曰王制諸

侯於天子比年一小聘三年一大聘五年一朝文公
即位六年君朝於晉者再而貴卿比年往聘過於事
天子之禮而京師之朝終其世不見於經蓋諸侯知
有霸主而不知有王也 黃氏正憲曰季文子專執
國政不能以禮佐其君乃與教相繼出聘阿結彊援
故既書如陳又書如晉所以著其私交樹黨爲三家

僭竊之
斬也

八月乙亥晉侯驩卒

驩喚官反
公作謹

左傳

八月乙亥晉襄公卒靈公少晉人以難故欲立長君趙孟曰立公子雍好善而長先君愛之且

近於秦秦舊好也置善則固事長則順立愛則孝結

舊則安為難故故欲立長君有此四德者難必抒矣

賈季曰不如立公子樂辰嬴嬖於二君立其子民必

安之趙孟曰辰嬴賤班在九人其子何震之有且為

二嬖淫也為先君子不能求大而出在小國辟也母

淫子辟無威陳小而遠無援將何安焉杜祁以君故

讓偏姑而上之以狄故讓季隗而已次之故班在四

先君是以愛其子而仕諸秦為亞卿焉秦大而近足

以為援母義子愛足以威民立之不亦可乎使先蔑

士會如秦逆公子雍賈季亦使召公子樂於陳趙孟

使殺諸郟

郟杜注晉地博物記垣縣有郟郟之阨今河南懷慶府濟源縣西一百里有郟亭唐置郟元縣於此

與山西垣曲縣接界

集說

李氏琪曰齊孝公不能率桓公之烈晉襄能繼晉文之統孝公初宋有抑齊之志襄公初秦懷

駕晉之謀宋啟甌之爭秦尋殺之釁此皆爭伯之端也孝公不能抗宋而襄公首能挫秦此晉之所以未

失伯也文公之沒三彊竝興秦雄西陲狄犄北師楚復彊於南苟縱一敵則晉伯去矣襄公夏戰殺以却

秦秋敗箕以翦狄冬伐許以離楚一年之間三敵悉退亦可謂有伯者之略此其能繼文者也苟有伯者

之略則襄公之烈何爲僅止乎此曰外患既息舉動即異伐衛則損威矣會公孫敖則毀列矣士穀主盟

則權散矣處父救江則謀怠矣越一二載事不逮初
況能持久乎是以君子不貴速成而圖全於其終不
志小利而慮患於其遠襄
之規模又後於文公甚矣

冬十月公子遂如晉

葬晉襄公

左傳

冬十月襄仲如晉葬襄公

集說

杜氏預曰卿共葬事文襄之制也三月而葬速
孔氏穎達曰昭三十年傳曰先王之制諸侯

之喪士弔大夫送葬昭三年傳曰昔文襄之霸也其
務不煩諸侯君薨大夫弔卿共葬事是也汪氏克

寬曰鄭子大叔曰先王之制諸侯之喪士弔大夫送
喪稽之於經前此未有使卿送葬者雖桓文之霸止

遣微者會葬蓋晉文昉爲霸令使大夫弔卿共葬事故叔孫婣葬平公季孫意如葬昭公駟致少姜以妾媵而諸侯使卿會葬矣又曰趙盾患秦之送公子雍欲禦秦師故急於襄事季氏本曰晉自襄以後書葬者悼平昭頃皆甫三月不知其故豈其意在速定嗣君而遂以爲常制歟

晉殺其大夫陽處父晉狐射姑出奔狄

射殺作夜

左傳

賈季怨陽子之易其班也而知其無援於晉也九月賈季使續鞠居殺陽處父十一月丙寅晉

殺續簡伯賈季奔狄宣子使使駢送其帑夷之蒐賈季戮使駢使駢之人欲盡殺賈氏以報焉使駢曰不可吾聞前志有之曰敵惠敵怨不在後嗣忠之道也夫子禮於賈季我以其寵報私怨無乃不可乎介人之寵非勇也損怨益仇非知也以私害公非忠也釋此三者何以事夫子盡具其帑與其器用財賄親帥

扞之送
致諸竟

公羊

晉殺其大夫陽處父則狐射姑曷爲出奔射姑殺也射姑殺則其稱國以殺何君漏言也其漏

言奈何君將使射姑將陽處父諫曰射姑民衆不說不可使將於是廢將陽處父出射姑入君謂射姑曰陽處父言曰射姑民衆不說不可使將射姑怒出刺陽處父於朝而走

穀梁

稱國以殺罪累上也襄公已葬其以累上之辭言之何也君漏言也上泄則下閤下閤則上聲

且閤且聾無以相通夜姑殺者也夜姑之殺奈何曰晉將與狄戰使狐夜姑爲將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎襄公曰諾謂夜姑曰吾始使盾佐女今女佐盾矣夜姑曰敬諾襄公死處父主竟上事夜姑使人殺之君漏言也故士造辟

而言詭辭而出曰用我則
可不用我則無亂其德

胡傳

公羊子曰晉殺其大夫陽處父則狐射姑曷爲
出奔射姑殺也射姑殺則其稱國以殺何君漏

言也易曰不出戶庭无咎何謂也子曰亂之所生則
言語以爲階君不密則失臣臣不密則失身幾事不
密則害成是以君子慎密而不出也凡書殺者在上
則稱君在下則稱氏在衆則稱人在微則稱盜君與
臣同殺則稱國今殺處父者射姑耳君獨以漏言故
亦預殺焉所以爲後世戒也或以處父爲侵官非歟
曰人君用人失當則其國必危凡立於朝者舉當諫
君況身爲晉國之太傅邪若以爲侵官將相大臣非
其人百官有司失其職在位者當拱默自全陰聽人
主之所爲至於顛危而不救則將焉用彼相乎率天
下臣子爲持祿容身不忠之行以
誤朝迷國者必此侵官之說夫

集說

范氏甯曰親殺者夜姑而歸罪於君明由君言而殺之罪在君也

劉氏敞曰左氏曰侵官也

案左氏此事始末罪處父獨有稱趙宣子爲能耳改
蒐易將凡出晉侯何以謂處父侵官邪人君任賢不
稱必將致敗苟食祿者舉當諫君況處父晉國太傅
邪以此爲侵官是殺大臣爲拱默也如使大臣見賢
而舉謂之侵官見賢而不舉乃其職矣不亦謬乎
孫氏覺曰春秋殺大夫之例自下殺之者稱人自君
殺之者稱國襄公既卒新君方幼殺之者決非其君
然書之以君殺之爲文蓋公穀之說以爲其君漏言
而狐射姑殺之君漏言而處父見殺焉則殺之者君
耳非身殺之而以告言殺之亦等爾亦何論君亡乎
二傳之說皆是 王氏葆曰詩曰紹庭上下陟降厥
家謂人君陞黜大臣當由直道也襄公儻以大公至
正之道上下其臣雖予奪不盡當人亦退聽而無所
歸咎今乃漏言於射姑嫁怨於處父則是處父之罪

襄公致之矣。高氏閔曰：先書晉殺處父，繼書射姑，出奔則實殺處父之罪自著矣。陳氏傳良曰：兩下相殺，其書國殺，何春秋之法苟有賊而不知，則其君之罪也。是故晉胥童殺三卻，樂書中行偃殺胥童，齊崔杼殺高厚，鄭子展子西殺公子嘉，皆稱國而已矣。張氏洽曰：據左氏則若晉國之事一聽於陽處父者，及考穀梁所謂君漏言，則是易中軍乃處父密言於襄公，公不能謹而輕漏之，以致射姑之殺。處父春秋所以分其殺於君與大夫也。家氏鉉翁曰：射姑以私怨殺一大夫，其罪固當誅，而處父以私意黨趙氏，使有由是為政於晉，擅廢立，專刑賞，其末流遂有弑君之事。然則處父固當言言而以私，乃其罪也。吳氏澂曰：是時襄公已卒而書國殺者，若曰處父今日之死，實襄公殺之也。

閏月不告月，猶朝于廟。

告音枯

左傳

閏月不告朔非禮也閏以正時時以作事以
厚生生民之道於是乎在矣不告閏朔棄時政

也何以
爲民

穀梁

不告月者何
也不告朔也

胡傳

不告月者不告朔也不告朔則曷爲不言朔也
因月之虧盈而置閏是主乎月而有閏也故不

言朔而言月占天時則以星授民事則以節候寒暑
之至則以氣百官修其政於朝庶民服其事於野則
主乎是焉耳矣閏不可廢乎曰迎日推策則有其數
轉璣觀衡則有其象歸竒於扐以象閏數也斗指兩
辰之間象也象數者天理也非人所能爲也故以定
時成歲者唐典也以詔王居門終月者周制也班告
朔於邦國不以是爲附月之餘而弗之數也猶朝于
廟者幸其不已之辭子貢欲去告朔之餼羊子曰爾

愛其羊我
愛其禮

集說

何氏休曰禮諸侯受十二月朔政於天子藏於大祖廟每月朔朝廟使大夫南面奉天子命君

北面而受之比時使有司先告朔謹之至也受於廟者孝子歸美先君不敢自專也言朝者緣生以事死

親在朝朝莫夕已死不敢溲鬼神故事必於朔者感

月始生而朝杜氏預曰諸侯每月必告朔聽政因

朝宗廟文公以閏非常月故闕不告朔怠慢政事

孔氏穎達曰論語云子貢欲去告朔之餼羊是用特

羊告於廟謂之告朔人君即以此日聽視此朔之政

謂之視朔十六年公四不視朔僖五年傳曰公既視

朔是也視朔者聽治此月之政亦謂之聽朔玉藻云

天子聽朔於南門之外是也其日又以禮祭於宗廟

謂之朝廟周禮謂之朝享其歲首爲之則謂之朝正

襄二十九年正月公在楚傳曰釋不朝正於廟是也

告朔視朔聽朔朝廟朝享朝正二禮各有三名同日而爲之也文公以閏非常月故闕不告朔 啖氏助

曰公穀言不告月爲是非也案經文言不告月明當告也 孫氏復曰春秋二百四十二年閏月多矣獨

此書不告月者是常告也文既不告閏月猶朝於廟非禮可知 劉氏敞曰諸侯歲受朔於天子退而藏

之祖廟朔告月於祖廟退而班之百官正也閏不告月非正也朝廟爲告月也不告月而朝廟亦非正也

又曰公羊謂不告朔禮也猶朝於廟非禮也非也閏雖無常而政有常安得不告假令閏十二月者必有

立春立春之政所當告也若就前月告之則先時若就後月告之則不及時夏書曰先時者殺無赦不及

時者殺無赦由是觀之則自當告也 杜氏諤曰春秋志文公廢告朔而猶朝廟是幸其禮不盡廢聖人

愛禮之深意也 蘇氏轍曰春秋蓋有同辭而異實者矣猶三望猶繹可以已也猶朝於廟幸其不已也

王氏葆曰不曰朔而曰月蓋朔者月之初吉而月則積日而成也以閏月而不告則一月之政俱不舉聖人變文而書為怠政而設也高氏閔曰苟知朝廟之不可已則告月之禮曷為而可已哉朱子曰閏者所以定四時成歲天子以為月而頒之為諸侯而不奉以告是輕正朔而慢時令也公穀以為附月之餘日又曰天子不以告朔此說已非而猶字之義諸傳皆以為可已之辭大率皆譏其舍大政而謹小禮獨胡傳以為幸其不已之辭以我愛其禮證之則此義精矣黃氏仲炎曰自文公怠棄時政以閏月為非常月而廢告月之禮漸致其後雖常月亦不告矣此子貢所以欲去告朔之餼羊也汪氏克寬曰有朔而無中者為閏月月有晦朔則自然有閏無閏則失月行之數故曰主乎月而有閏也日月所會是謂辰以歷言之則是積餘分而置閏以日月星辰觀之則閏月日月亦會於辰與他月無以異也又曰周

天三百六十五度四分度之一日一日一周在天爲
不及一度積三百六十五日四分日之一而與天會
爲一歲月一日不及天十三度十九分度之七積三
百五十四日九百四十分日之三三百四十八而與日
會者十二爲一年大率三百六十日爲常數一歲多
五日九百四十分日之二百三十五分爲二十四氣
是爲氣盈而晝夜長短節氣寒暑於是定焉一年少
五日九百四十分日之五百九十二分爲十二月是
爲朔虛而晦朔弦望於是定焉積歲之有餘就年之
不足而後有閏三年一閏尚餘三日有奇五年再閏
則少五日有奇積十九年閏在十二月則氣朔分齊
大率三十二月則有閏閏前之月中氣在晦閏後之
月中氣在朔若歷不置閏則弦望晦朔皆非其正晝
夜平分不在春秋之中而寒暑反易矣故書云以閏
月定四時成歲周禮注中數曰歲朔數曰年中朔大
小不齊正之以閏乃天地自然之理歷家因其自然

而立積分之數以合之耳公羊謂閏月天無是月穀
梁謂附月之餘日皆非是夫二十九日九百四十分
日之四百九十九而晦朔交則爲一月月非有閏之
名特以日月行天疾徐之不同而歲年盈縮之有異
遂謂之閏天與日月之行自然有閏豈可謂天無是
月哉月非有餘也又豈可謂附月之餘哉月之有閏
則由乎天而月之名閏乃由於人故於文王在門爲
閏禮稱天子閏月則聽朔於明堂闔門左扉立於其
中王之謹乎閏月者如此而諸侯安可不告月哉考
之經傳凡言閏月多在歲終蓋是時厯法謬矣每置
閏於歲終故左傳以閏三月爲非禮則無中者不謂
之閏而名曰閏者非閏月矣秦之後九月實倣於此
是宜當時之卿大夫以天無是月指爲厯家所置而
導其君廢告朔之禮也說經者且曰天子不告朔尚
何責昏庸之魯文也哉春秋書猶朝廟即聖人愛禮
存羊之意謂朔雖不告而朝廟不廢則告朔之禮猶

有存者公穀皆曰猶者可以已也杜預亦云可止之辭大失春秋之意蓋聖人傷魯文之怠慢政事故特書不告月猶朝於廟若曰不如此而尚幸其如此將已而不遂已是知其不可已而自不能已也與猶三望猶繹之義不同嚴氏啓隆曰此閏月閏十二月也經書閏月者二皆在十二月

辛襄王三
丑十二年

七年

晉靈公夷皋元年齊昭十三年衛成十五年蔡莊二十六年鄭穆八年曹共三

十三年陳共十二年杞桓十七年宋成十七年秦康公瑩元年楚穆六年

春公伐邾

左傳

七年春公伐邾間晉難也

集說

杜氏預曰公因霸國有難而侵小

三月甲戌取須句

句公作胸

左傳

三月甲戌取須句寘文公子焉非禮也

集說

杜氏預曰絕太皞之祀以與鄰國叛臣僖公反其君之後邾復滅之今邾文公子叛邾在魯故

公使爲守須句大夫孫氏復曰惡再取也案僖二

十二年公伐邾取須句後其地復入於邾劉氏啟

曰公羊曰取邑不日此何以日內辭也使若他人然

非也僖公時亦嘗伐邾取須句矣何不爲內辭哉穀

梁曰取邑不日此其日何也不正其再取故謹而日

之非也設不日則聽其取乎諸取邑不日者皆聽之

矣黃氏仲炎曰齊靈公與臧紇言伐晉臧紇對曰

抑君似鼠夫鼠晝伏夜動不穴於寢廟畏人故也今

君聞晉之亂而後作焉非鼠而何觀魯文公聞晉難

而伐邾取邑是亦臧紇之所謂鼠者爾汪氏克寬

曰僖公雖曰私其母家猶有崇明祀保小寡之義
文公乘霸國之喪貪土地而舍逋逃其罪益甚矣

遂城郟

郟音吾 郟杜注魯邑卞縣南有郟
城今在山東兗州府泗水縣東南

穀梁

遂繼事也

集說

杜氏預曰因伐郟師以城郟備郟難 孫氏復
曰遂城郟重勞民也 趙氏鵬飛曰僖公蓋嘗

伐郟取須句矣其後復歸之今文公效尤復伐而取
焉僖公有善文弗率也僖公之失必履其轍吾於此
尤見文之不子矣既伐郟取邑師徒亦頓敝又遂城
郟文公以爲既伐郟以攘郟之邑不可不城郟以備
郟之兵是一舉而兩得也其亦念兵之勞而民之疲
歟况三月今之正月東作之時而奪農時則一歲之
獲荒矣文公何以爲國乎 汪氏克寬曰文公以郟
叛臣守須句之地又重勞民力城內邑以防郟師之

至心有慊焉故畏鄰國之
伐而不知愈重其過也

夏四月宋公王臣卒

穀作
壬臣

集說

高氏閏曰以國亂故不葬凡治則禮詳亂則禮略家氏鉉翁曰不書葬責嗣子輕舉召亂葬

不如禮

汪氏克寬曰其弟禦殺世子而自立國人

殺禦而立其少子杵臼是為昭公

季氏本曰昭公

初立羣族亂作於是送終之禮廢矣故凡不書葬者非皆由魯不會亦有其國葬不備禮而謝絕諸侯者

宋成公

是矣

宋人殺其大夫

左傳

夏四月宋成公卒於是公子成為右師公孫友為左師樂豫為司馬鱗矐為司徒公子蕩為司

城華御事爲司寇昭公將去羣公子樂豫曰不可公
族公室之枝葉也若去之則本根無所庇廕矣葛藟
猶能庇其本根故君子以爲比況國君乎此諺所謂
庇焉而縱尋斧焉者也必不可君其圖之親之以德
皆股肱也誰敢攜貳若之何去之不聽穆襄之族率
國人以攻公殺公孫固公孫鄭於公宮六卿和公室
樂豫舍司馬以讓公子卬昭公即位而葬書曰
宋人殺其大夫不稱名衆也且言非其罪也

胡傳

書宋人者國亂無政非君命而衆人擅殺之也
大夫不名義繫於殺大夫而其名不足紀也

集說

杜氏預曰不稱殺者及死者名殺者衆死者無
罪又曰二子在公宮爲亂兵所殺趙氏匡曰

以三世內娶便云三世無大夫公羊之說不近人理
若實殺有罪何以不書死者之名乎穀梁之說非也
陸氏淳曰非君意而殺之者衆不可書名特加人
字以別之又明死者無罪高氏閔曰貶責無所寄

直志其衆亂無政而已。陳氏傳良曰：終昭公之世，不名其大夫。春秋有天下之辭，有一國之辭，有一人之辭。於魯莊公，凡會齊襄，皆書人，是一國之辭也。於魯桓公，凡大夫將，皆不言大夫，於宋昭公，凡大夫，不名，是一人之辭也。吳氏澂曰：穆襄之族率國人，人衆非一人也，故稱宋人死者不幸而遭亂兵，非有可殺之罪，故不書名。汪氏克寬曰：宋昭方居諒陰，明年復殺司馬而逐司城，經書宋公王臣卒，宋人殺其大夫。明年又書宋人殺其大夫，司馬宋司城來奔，以見嗣君之無政。先君在殯而國人作亂，以戮其大夫，踰年而掌兵之官見誅，守國之官見逐，皆書宋人，而昭公之爲君可知矣。曾未十年而有帥甸之弑，經以大惡繫之，宋人所以備責昭公不足爲宋人之君也。余氏光曰：成公在殯，昭公首爲亂階，至使公族構難，大夫罹殃，其不君甚矣。然則固與鄭也，何以不名？是必

從君於昏者他日昭公被弑蕩意諸不得與孔父仇牧荀息齒即大夫不名之義也

戊子晉人及秦人戰于令狐晉先蔑奔秦

令力呈反蔑公作昧奔上

有以

師字

左傳

秦康公送公子雍於晉曰文公之入也無衛故有呂卻之難乃多與之徒衛穆嬴日抱大子以

啼於朝曰先君何罪其嗣亦何罪舍適嗣不立而外求君將焉寘此出朝則抱以適趙氏頓首於宣子曰先君奉此子也而屬諸子曰此子也才吾受子之賜不才吾唯子之怨今君雖終言猶在耳而棄之若何宣子與諸大夫皆患穆嬴且畏偪乃背先蔑而立靈公以禦秦師箕鄭居守趙盾將中軍先克佐之荀林父佐上軍先蔑將下軍先都佐之步招御戎戎津爲右及董陰宣子曰我若受秦秦則寘也不受寇也既

不受矣而復緩師秦將生心先人有奪人之心軍之善謀也逐寇如追逃軍之善政也訓卒利兵秣馬蓐食潛師夜起戊子敗秦師于令狐至於刳首已丑先蔑奔秦士會從之先蔑之使也荀林父止之曰夫人大子猶在而外求君此必不行子以疾辭若何不然將及攝卿以往可也何必子同官爲察吾嘗同察敢不盡心乎弗聽爲賦板之三章又弗聽及亡荀伯盡送其帑及其器用財賄於秦曰爲同察故也士會在秦三年不見士伯其人曰能亡人於國不能見於此焉用之士季曰吾與之同罪非義之也將何見焉及歸遂不見

董陰杜注晉地 刳首杜注令狐在河東與刳首相接案令狐今平陽府猗氏縣地水經注刳首在

西三十里當在今

滎河臨晉間也

公羊

何以不言師敗績敵也
何以不言出遂在外也

穀梁

不言出在外也輟戰而
奔秦以是爲逃軍也

胡傳

案左氏襄公卒大子幼晉人欲立長君趙孟使
先蔑如秦逆公子雍秦康公以師納之襄夫人

日抱大子以啼於朝曰舍適嗣不立而外求君將焉
寘此諸大夫畏偪乃背先蔑立靈公趙盾將中軍以

禦秦潛師夜起敗秦師于令狐先蔑奔秦程氏以爲
晉不謝秦秦納不正皆罪也故稱人晉懼秦之不肯

已而擊之是晉人爲志乎是戰者也故書及其貶之
如此者使後世臣子慎於廢立之際不可忽也治亂

存亡繫國君之廢立事莫重於此矣而可以有誤乎
奕者舉棋不定不勝其耦況置君而可以不定乎

集說

孫氏復曰秦晉自殺之役結怨用兵償報不已
故自是不復名將帥但曰某人某人而已言戰

不言敗者勝負敵也先蔑書者不可言晉人故也不
言出者明自軍中而去 王氏沿曰既貶宣子又貶
秦伯罪各當誅 陳氏傳良曰宋襄公納齊孝公戰
于羸貶稱師秦康公送晉公子雍戰于令狐貶稱人
秦晉之交兵於是再世自令狐之後不悉書矣八年
秦伐晉取武城不書十年晉伐秦取少梁不書 張
氏洽曰如左氏說則當書晉人敗秦師于令狐今書
晉及秦戰又不言敗者交貶之也然二國之兵晉曲
尤甚故秦伯趙盾皆稱人而特以晉及且不書秦師
之敗深罪晉人置君而不定也 黃氏仲炎曰平其
心以觀天下之故則是非利害未嘗不甚明一或錮
於貪欲之私則如逐鹿者不見泰山矣觀荀林父之
戒先蔑者平心之言也故卒不逃其所料惟先蔑之
意在於覬覦立君之功而不暇擇焉將以求福乃更
得禍此可爲行險者之戒矣 汪氏克寬曰晉襄以
前年八月卒十月葬矣秦人豈不知其已立君而至

是始納公子雍耶蓋趙盾始議求長君而中變其說秦人雖知其立靈公而欲以重兵彊納公子雍以爭國也夫康公始爲大子送舅氏而念母之不見故作渭陽之詩是固良心也今乃納庶孽而奪嫡甥之位自是兵爭不息豈非怨欲害乎良心而然歟不然春秋釋秦而專罪趙盾矣

案公羊此偏戰也又云此晉先昧也其稱人何貶曷爲貶外也其外奈何以師外也以是戰爲偏戰而以晉人爲指先昧是不知晉三軍之在行而將中軍者之爲趙盾也然先蔑既將下軍而又奔秦即以爲逃軍亦可故刪節公羊而存穀梁

狄侵我西鄙

左傳

狄侵我西鄙公使告於晉趙宣子使因賈季問鄆舒且讓之鄆舒問於賈季曰趙衰趙盾孰賢

對曰趙衰冬日之日也趙盾夏日之日也

集說

許氏翰曰狄懲箕之敗四年間一侵齊而未敢肆至是復侵魯侵齊侵宋侵衛晉襄既沒莫之

忌矣

高氏閱曰魯間晉難而伐邾則狄亦間晉難而侵魯聖人書此罪魯之不自正也張氏洽曰間

秦晉之爭也

湛氏若水曰晉襄既沒霸業陵替秦晉交爭狄人窺伺其間大肆內侵故侵魯侵齊侵宋

侵衛之事

漸見矣

秋八月公會諸侯晉大夫盟于扈

扈杜注鄭地滎陽卷縣西北有扈亭今在

河南開封府原武縣西北

左傳

秋八月齊侯宋公衛侯陳侯鄭伯許男曹伯會晉趙盾盟于扈晉侯立故也公後至故不書所

會凡會諸侯不書所會後也
後至不書其國辟不敏也

穀梁

其曰諸侯略之也

胡傳

諸侯會晉趙盾盟于扈為晉侯立也諸侯不序見公之不及於會也文公怠惰事多廢緩既約

晉盟而復後至故隱其不及罪公之不能自彊於政治魯自是日益衰矣

集說

趙氏匡曰諸侯不序公不得與之盟也而曰公會諸侯盟者言公附於載書也載書不可從附

與盟

主之大夫敵焉也責公不早赴而自取其恥爾

劉氏敞曰公羊曰諸侯不可使與公盟跌晉大夫

使與公盟非也在會者皆諸侯也既與公盟矣又何云跌晉大夫乎且諸侯不欲與魯侯盟乃敢跌晉大

夫使之盟乎皆事之不然者也孫氏覺曰春秋書

及某大夫盟者惟二例耳莊九年公及齊大夫盟于

既及此晉大夫是也。既之盟，齊襄被弑而無知見討。小白在外而未入齊，方無君，齊之大夫不求盟以紓國之難，則安危未可知。於是權宜與公盟，齊無君，大夫盟，公非大夫之罪，是以不名。而曰齊大夫也，晉襄已葬，靈公尚幼，晉之大夫求盟，諸侯以紹先君之業，而諸侯皆會晉之嗣君，幼不能盟，則大夫權宜而盟。諸侯以大夫伉，諸侯則有罪矣。然不幸而值幼君，則不可不假一時之權，是以不名。而曰晉大夫也，春秋之法，外臣而盟，我君皆書名，以見其罪。不幸其國無君，若無知之亂，則齊之大夫得免焉。大夫而盟，諸侯亦書其名，以見其罪。不幸其君薨而嗣子少，若靈公之在抱，則晉之大夫得免焉。舍是二者，未有不得罪於春秋者矣。春秋之法，前日後凡扈之盟，不序而前，無所見以晉之大夫不名，不以諸侯之序而敵一大夫也。春秋通晉大夫之得盟，諸侯是以不列。諸侯之爵也。程子曰：文公怠政事多廢，緩既約，晉盟而復。

後至故書往會而隱其不及不序諸侯以見其不在故明年公子遂再往與晉盟也許氏翰曰諸侯何

以不序大夫何以不名大夫而主盟諸侯自扈之會始也吳氏澂曰經書諸侯者皆前目後凡此年以

前並無諸國之目若無左傳則不知其爲齊宋衛陳鄭許曹七國之君不列叙諸國而但言諸侯以無盟

主而大夫彊合諸國之君故略之也李氏廉曰文公之編三會于扈皆止書諸侯左氏以十五年盟扈

書諸侯無能爲也十七年會扈書諸侯無功也是則總稱諸侯者皆罪諸侯也此總稱諸侯爲公後至也

諸侯皆在公獨後至故諱公罪而歸責於諸侯若言諸侯無功然所以辟公之不敏也汪氏克寬曰經

書大夫之盟不書名氏者三莊公九年書及齊大夫盟時襄公已弑桓公未入齊無君當國大夫自爲主

而與莊公盟故大夫不書名氏此年趙盾初立靈公亦若晉無君然故趙盾亦不書名氏溴梁之會諸侯

皆在而十一國之大夫自盟則諸國皆若無君矣故亦但書大夫盟扈之盟書晉大夫霸主失政也渠梁之盟書大夫則諸侯皆失政矣

案諸侯不序左氏以爲公後至劉氏敵孫氏覺皆駁之劉氏又謂諸侯不序爲欲治宋而後不能與十五年盟扈十七年會扈左氏所謂諸侯無能爲諸侯無功者其意相合似亦有理然趙氏匡胡氏安國皆主左氏而程子又引遂會衛雍討扈後至爲證故今仍從左氏焉趙盾不名胡傳謂盾內專廢置其君外疆諸侯爲此盟故略而不名非也盾自新城以後皆以名書惟此年盟扈以主幼而得無貶耳孫氏覺之說得之矣

冬徐伐莒

集說

劉氏敞曰杜云不書將帥徐告辭略非也傳云徐伐莒莒來請盟然則莒來告也且徐不來告

則已苟其來告若不稱君必當稱將帥豈亦自云徐而已乎杜氏之意固以謂從赴告而向者晉人戰于

命狐又何以云
貶趙盾稱人哉

公孫敖如莒涖盟

公穀作莒

左傳穆伯娶於莒曰戴已生文伯其娣聲已生惠叔戴已卒又聘於莒莒人以聲已辭則爲襄仲聘

焉冬徐伐莒莒人來請盟穆伯如莒涖盟且爲仲逆及鄆陵登城見之美自爲娶之仲請攻之公將許之叔仲惠伯諫曰臣聞之兵作於內爲亂於外爲寇寇猶及人亂自及也今臣作亂而君不禁以啓寇讎若之何公止之惠伯成之使仲舍之公孫敖反之復爲兄弟如初從之

穀梁

莅位也何也前定也

集說

高氏閱曰莒爲徐所伐故來求援而請修洮之盟教娶於莒故許其盟而請往涖之趙氏鵬

飛曰魯有徐之患久矣自伯禽受國而有費誓之師入春秋服於齊桓之令而不敢仇於諸侯今霸主不作徐將爲魯患彼其伐莒蓋所以撼魯也公孫敖於是往盟於莒修僖公洮向之好協謀以備徐也吳氏澂曰魯臣每欲娶婦必請於君行聘會之禮假公事以遂其私君之無政臣之無禮也况教代弟逆名尤不正卒以淫奔禽獸之行也湛氏若水曰莒以弱小之國見伐於徐公孫敖如盟以救之似禮矣而教之意不在於救莒因盟莒以爲迎娶之地假公以圖私濟邾以害正故春秋書之使人考其跡知其心而非禮自見矣

附錄左傳

晉卻缺言於趙宣子曰日衛不睦故取其地今已睦矣可以歸之叛而不討何以示

威服而不柔何以示懷非威非懷何以示德無德何以主盟子爲正卿以主諸侯而不務德將若之何夏書曰戒之用休董之用威勸之以九歌勿使壞九功之德皆可歌也謂之九歌六府三事謂之九功水火金木土穀謂之六府正德利用厚生謂之三事義而行之謂之德禮無禮不樂所由叛也若吾子之德莫可歌也其誰來之盍使睦者歌吾子乎宣子說之

壬襄王三八年晉靈二年齊昭十四年衛成十六年蔡

寅十三年莊二十七年鄭穆九年曹共三十四年
陳共十三年杞桓十八年宋昭公
杵臼元年秦康二年楚穆七年

春王正月

附錄左傳

八年春晉侯使解揚歸匡戚之田於衛且復致公壻池之封自申至於虎牢之竟

申杜注鄭地當在

鄭州汜水縣界

夏四月

附錄左傳

夏秦人伐晉取武城以報令狐之役

秋八月戊申天王崩

左傳

秋襄王崩

集說

史記襄王崩子頃王壬臣立頃王六年崩陸氏淳曰頃王不書崩

冬十月壬午公子遂會晉趙盾盟于衡雍

盾徒本反雍於用反

左傳

晉人以扈之盟來討冬襄仲會晉趙孟盟于衡雍報扈之盟也

集說

高氏閔曰衡雍晉文公會諸侯朝王之處也夫天王崩諸侯不奔喪而看遂皆國之正卿乃自

相會盟於王畿之內惡莫大焉

任氏公輔曰晉魯

之用事者會盟政在大夫矣

張氏洽曰後漢河南

卷縣有垣顛城古衡雍也與扈相近自晉文翟泉之

盟付之諸大夫文公復以國事付之公子遂而不知

一國之禮樂征伐皆自公子遂出此敬嬴所以得窺

伺間隙私事之以胚胎殺適立庶之禍也汪氏克

寬曰大夫專盟始此前此盟翟泉猶有僖公在會也

自是而有袁婁之盟雞澤溴梁諸侯皆在而大夫自

盟矣于宋于虢則晉楚大夫狎主齊盟而諸侯不復

在矣其事自衡雍之盟始也況當是時仲遂已有無

君之心而晉討文公之盟扈必要仲遂歃血而後信

亦猶成公之沙隨不得見而季孫行父會晉郤犇盟

于扈昭公弔少姜不見納而季孫宿如晉馴致乾侯
之次晉不能修方伯之職而意如會荀躒於適歷矣
三桓專魯六卿分晉
豈一朝一夕之故哉

乙酉公子遂會雒戎盟于暴

雒音洛雒戎公作伊雒戎
暴杜注鄭地路史曰暴

辛公采地
一曰暴隧

左傳

遂會伊
雒之戎

胡傳

春秋記約而志詳其書公子遂盟趙盾及
雒戎何辭之贅乎曰聖人所以別內外也

集說

劉氏敞曰左氏曰珍之也言遂權與戎盟得事
之宜故襄稱公子非也若兩稱公子為襄者僖

三十年公子遂如京師遂如晉則貶矣彼不謂貶何
邪 孫氏覺曰盟于衡雍盟于暴一公子遂耳壬午

乙酉四日耳公子遂一人相去四日之間而行二事於經可以言遂也然不曰遂者衡雍之盟與暴之盟皆受命於其君而後行事非繼事之謂是以不曰遂也蘇氏轍曰公子遂既盟趙盾四日而盟維戎皆公命也何以知其皆公命也以其書維戎之盟與書趙盾之盟一也張氏洽曰盟盾未幾而遂會維戎不以遂事言之所以辨內外也李氏廉曰內大夫特盟外大夫二公子遂會晉趙盾盟衡雍季孫行父及晉卻犇盟于扈是也此皆權臣專行之事而此爲造端春秋於翟泉歷貶諸國大夫而此無譏焉蓋不

勝譏矣

公孫敖如京師不至而復丙戌奔莒

公無而字

左傳

穆伯如周弔喪不至以幣奔莒從已氏焉

胡傳

案左氏公孫敖奔莒從已氏也男女人之大欲存焉寡欲者養心之要欲而不行可以爲難矣

教如京師其書不至而復者言教無

入使於周之意惟已氏之欲從也

集說

陸氏淳曰還者事畢復者未畢師還公還自晉歸父還自晉士甸聞齊侯卒乃還皆不當更往

又竝合禮故曰還事畢也公如晉至河乃復公孫敖

如京師不至而復仲遂至黃乃復皆事未畢而復也

孫氏復曰公孫敖如京師弔喪也不至而復丙戌

奔莒文公不能誅敖得以自恣文公之惡亦可見矣

不言所至者舉京師爲重也劉氏敞曰何以不言

出受命矣自外出也大夫受命而出君言不宿於家

臣子大受命則何以不言其至近也曷爲或言而復

或言乃復乃難乎而也朱子曰文定云色出於性

淫出於氣其說原於上蔡此殊分得不是大凡出於

人身上道理固皆是性色固性也然不能節之以禮

制之以義便是惡孟子云君子不謂性其語便無病
又曰只不至而復便是大不恭魯亦不再使人往皆
罪也文定只貶他從已氏之過經文原不及此事
張氏洽曰國君爲天子斬衰教受命以赴天王之喪
廢君命而徒返已爲不赦之罪況懷桑中之行而淫
奔乎文公容其復而奔魯之無政刑也宋氏宜春
曰公不奔喪而卿行是諸侯不有天子也教如京師
不至復是大夫不有諸侯也黃氏仲炎曰觀遂之
專教之恣則文公之不能制其臣可知矣汪氏克
寬曰教豈惟無王實以無君文公既不加壅命之譴
於教又不遣他卿如京師況天王之喪赴告及魯已
三越月仲遂盟戎近在王都之側若罔聞知徐徐遣
教方共弔事又且教不至而亟還以喪考妣之戚而
恻然忘情不啻秦越亦不思僖公母子之喪王臣將
命者至再而至三也經書乙酉公子遂會雒戎公孫
敖如京師不至而復丙戌奔莒非獨著教之罪舉魯

國君臣之罪皆不
逃聖筆之誅矣

案不至而復經文甚明孫氏以爲中道而返者得之
諸家謂受命不行者非也若果不行聖人何難據實
以書
之乎

螽

螽公
作螽

集說 何氏休曰先是公如晉公子遂公孫敖比出不
可使勢奪於大夫煩擾之應 杜氏預曰爲災

故
書

宋人殺其大夫司馬宋司城來奔

左傳

宋襄夫人襄王之姊也昭公不禮焉夫人因戴
氏之族以殺襄公之孫孔叔公孫鍾離及大司

馬公子印皆昭公之黨也司馬握節以死司城蕩意諸來奔效節於府人而出公以其官逆之皆復之

胡傳

初宋昭公將去羣公子樂豫以爲不可遂舍司馬以讓公子印則印固昭公之黨欲專宋政而

昭公固欲以其弟印自衛也夫司馬掌兵之官不選衆舉賢以素有威望爲國人所畏服者使居其任乃欲寵其私昵鮮有不亡者矣公子印蕩意諸皆以官舉者見主兵者不能其官至於見殺守土者不能其官至於出奔而其君不免失身見弑之禍宜矣

集說

劉氏敞曰司馬者何司城者何皆官舉也曷爲皆官舉言不能其官也不能其官者何君弱政

亂彊臣擅命然則何以不名非國討也非國討則孰討之華孫殺之華孫逐之曰宋人殺其大夫司馬宋司城來奔何曰是卿也不能其官者非他人之罪也又曰左氏云司馬握節以死司城效節以出公以其

官逆之故皆書官非也計司馬握節未如仇牧司城奉身以退不及荀息而左氏推彼二人為貶申此兩人為賢輕重貿易莫甚於此且身居亂兵之中苟棄節偷生則為大罪握節而死人臣之常耳既無智力以禦亂又欲負節而私逃亦大罪也效節而出自求免罪而已未見可貴之美也魯公庸人不識大義則妄以其官逆之春秋亦何為珍之耶又曰公羊曰宋三世無大夫非也僖二十五年宋殺其大夫不舉名氏以謂宋無大夫也今此舉官亦云無大夫若實內娶無大夫者都無所舉是矣或官舉或不舉何哉又曰穀梁曰以其官稱無君之辭也鄭康成解云謂無人君之德皆非也既有大夫矣何謂無君又晉殺其大夫卻錡卻犇卻至竝尸三卿亦可謂無君德者則曷為不以官稱之黎氏鎔曰司馬典兵之官而殺之司城扞禦之任而來奔則主勢孤矣宜昭公卒死於弒胡氏寧曰列國大夫未有書官者宋卿何以

書程氏云宋王者之後得自命官故獨書爾不備書
省詞也因公子印蕩意諸不任二官之職華孫以逆
族而主兵權所謂因事之變者而書之亦猶魯之郊
禘云爾陳氏傅良曰未有書官者於是官從其官
司馬司城是也未有書字者於是字從其字子哀是
也張氏洽曰司城司空也宋以武公名司空諱之
故曰司城黃氏仲炎曰紀綱不立政權紛亂則君
臣不能相保且仕於亂邦濫嬰戮辱非君子見幾之
道也垂戒之義明矣家氏鉉翁曰司馬司城皆國
之柄臣穆襄之族連歲怙亂固昭公有以致之然爲
司馬司城者當思所以防患之計乃置之弗戒至於
乘釁再作司馬死而司城奔由昭公信任非人以私
昵寵臣而在列位既不慮患於平日復不制變於臨
時也吳氏澂曰宋人者戴氏之族非一人也見昭
公無政而臣庶得以擅殺大夫也賀氏仲軾曰殺
其大夫所以志亂也而此則專舉二人華督之事則

書及其大夫仇牧所以志節也而此不稱名氏特變文以官書之者蓋以其官責之也且見司馬非人所得殺之官而司城亦非意諸所得奔之官也


案大夫者階也司馬司城者官也宋殺大夫司馬司城來奔猶云殺其大夫中之司馬而大夫中之司城來奔耳大夫貫下司馬司城言攷之周官卿非一人有大宰大司空大宗伯等大夫亦非一人有小宰小司徒小宗伯等可以知矣

附錄左傳

夷之蒐晉侯將登箕鄭父先都而使士穀梁益耳將中軍先克曰孤趙之勲不可廢

也從之先克奪蒯得田於董陰故箕鄭父先都士穀梁益耳蒯得作亂

欽定春秋傳說彙纂卷十七



覆校官檢討 臣 李學錦

校對官檢討 臣 陳夢元

謄錄監生 臣 楊省曾